


CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
OCT 31 1940

T9299/8233.4(12)

12



卷五十五

東吳俞安期

宣城柳

鍾

武帝

武帝

齊

武帝

武帝

武帝

武帝

詩雋類函卷五十五

東吳俞安期彙纂

宣城梅鼎祚增定

樵李鍾英訂校

哈佛大學漢和
圖書館珍藏印

武部一

講武
征伐
教戰附

教戰附
行軍併入

校獵
從征

射
觀兵

○講武

從武帝瑯琊城講武應詔

齊王融

治兵聞魯策訓旅見周篇教民良不棄任智理恒全
白日映丹羽頽霞文翠旃凌山炫組甲帶水被戈船
凝葭鬱摧愴清管乍聯綿早逢文化洽復屬武功宣
願陪玉鑾右一舉掃燕然

和武帝講武宴二首

梁簡文帝

校尉開疎勒將軍定月支南通新息柱北屆武陽碑
豫遊戲馬館教戰昆明池銀塘瀉清渭銅溝引直漪
常從良家子命中幽并兒金鞍飾紫佩玉燕帖青驪
車書今已共願奏云亭儀

祭壺今息鼓董案或開帷聊舉青龍陣正取絳宮時
犒兵隨後拒輶祭逐前師軍門初露節步陳始分旗

從齊武帝瑯琊城講武應詔 梁沈約

九功播祧墀七德陳武懸展事昌國圖息兵由重戰
皇情恣閱典出車迨辰選飾徒映寒隰翻綏臨廣甸

颯沓佩吳戈參差腰夏箭風旆舒復卷雲霞清以轉
輕舞信徘徊前歌且遙衍秋原嘶代馬朱光浮楚練
虹壑寫飛文巖阿藻餘絢發震岳靈從揚旌水華變
憑高訓武則中天起遐眷鳳蓋捲洪河珠旗掃一作拂
長汧方待翠華舉遠適瑤池宴

從駕觀講武

北周庾信

校戰出長楊兵欄入鬪場置陣橫雲起開營鴈翼張
門嫌磁石礙馬畏鐵菱傷龍淵觸牛斗繁弱駭天狼
落星奔驥駮浮雲上驕驕急風吹戰鼓高塵擁貝裝
駭猿時落木驚鴻屢斷行樹寒條更直山枯菊轉芳

一作香 豹略推全勝龍圖揖所長小臣欣寓目還知奉
會昌

奉和杜員外扈從教閱

唐李嶠

初

杪冬嚴殺氣窮紀送頽光薄狩三農隙大閱五戎場
萊田初起燒蘭野正開防夾岸虹旗轉分朋獸罟張
燕弧帶曉月吳劔動秋霜原啓前禽路山縈後騎行
雲區墜日羽星苑斃天狼禮振軍容肅威宣武節揚
神心體殷祝靈兆叶姬祥幸陪仙駕末欣採翰林芳

吳宮教美人戰

唐顏粲

中

有客陳兵畫功成欲霸吳玉顏承將略金鈿指軍符

轉佩風雲暗鳴輦錦繡趨雪花頻落粉香汗盡流珠
掩笑誰欺令嚴刑必用誅至今孫子術猶可靜邊隅

吳宮教美人戰

唐葉季良

中

強吳矜霸略講武在深宮盡出嬌娥伎先觀上將風
揮戈羅袖卷擐甲汗妝紅掩笑分旗下含羞入隊中
鼓停行未正刑舉令纔崇自可威隣國何勞逞戰功

昆明池水戰詞

唐溫庭筠

晚

汪汪積水光連空重疊細紋晴激紅赤帝龍孫鱗甲
怒臨流一時生陰風鼉鼓三聲報天子雕旌獸艦凌
波起雷吼濤驚白石山石鯨眼裂蟠蛟死溟池海浦

俱喧逐青幟白旌相次來箭羽槍纓三百萬踏翻西
海生塵埃茂陵仙去菱花老唼唼游魚近煙島渺莽
殘陽釣艇歸綠頭江鴨眠沙草

○校獵

校獵

魏文帝

中車出鄴宮校獵東橋津重置施密網罕畢飄如雲
鸞弓忽高馳一發連雙麇

仲春振旅

晉傅玄

仲春振旅大致民武教於時日新師執提工執鼓坐
作從晉書作起節有序盛矣允文允武蒐田表禡申法誓

遂圍禁獻社祭允以時明國制文武並用禮之經列
車如戰大教明古今誰能去兵

夏苗田

晉傅玄

夏苗田運將徂軍國異容文武殊乃命羣吏撰車徒
辨其號名讚契書王軍啓八門行同上帝居時路建
大麾雲旗翳紫虛百官象其事疾則疾徐則徐回衡
旋軫罷陳弊車獻禽享祠蒸蒸配有虞

仲秋獮田

晉傅玄

仲秋獮田金德常剛涼風清且厲凝露結爲霜白藏
司辰蒼隼時鷹揚鷹揚猶尚父順天以殺伐春秋時

叙雷霆振威曜進退由鉦鼓致禽祀祊羽毛之用充
軍府

順天道

晉傅玄

順天道握神契三時示講武事冬大閱鳴鐻振鼓鐸
旌旗象虹霓文制其中武不窮武動軍誓衆禮成而
義舉三驅以崇仁進止不失其序兵卒練將如闕虎
惟闕虎氣凌青雲解圍三面殺不殄羣偃旌麾班六
軍獻享蒸修典文

遊獵篇

晉張華

歲暮凝霜結堅冰
函幽泉厲風蕩原隰浮雲蔽昊天

玄雲掩靄合素雪紛連翩鷹隼始擊鷙虞人獻時鮮
嚴駕鳴儔侶攬轡過中田戎車方四牡文軒馭紫燕
輿徒旣整飭容服麗且妍武騎列重圍前驅抗脩旃
倏忽似回飈絡繹若浮煙鼓噪山淵動衝塵雲霧連
輕繒拂素霓織網蔭長川游魚未暇竄歸鳥不得還
一作旋由基控繁弱公差操黃間機發應弦倒一縱連

雙肩僵禽正狼籍落羽何翻翻積獲被山阜流血丹
中原馳騁未及勅曜靈俄移晷結罟彌藪澤囂聲振
四鄙鳥驚觸白刃獸駭挂流矢仰手接游鴻舉足蹴
犀兕如黃批狡兔青骹撮飛雉鵠驚不盡收鳥驚安

足視日冥徒御勞賞勤課能否野饗會衆賓玄酒甘
 且旨燔炙播遺芳金觴浮素蟻珍羞墜歸雲織看出
 淥水四氣運不停年時何疊疊人生忽如寄居世遽
 能幾至人同禍福達士等生死榮辱渾一門安知惡
 與美遊放使心狂覆車難再履伯陽為我誠檢跡投
 清軌

校獵曲

齊謝朓

凝霜冬十月殺盛涼飈哀原澤曠千里騰騎紛往來
 平望望煙合烈火從風迴殫獸華容浦張樂荆山臺
 虞人昔有諭明明時戒哉

行行且遊獵篇

梁劉孝威

之采講射所上林娛獵場選徒騎楚客召狩跨胡王
 罕車已戒道風烏復起行飲飛具矰繳材官命蹶張
 高冒掩月兔勁矢射天狼蹠地不遑逸排虛豈及翔
 日暮勾陳轉風清鏡吹颺歸來宴平樂寧肯滯禽荒

行行且遊獵篇

唐李白盛

邊城兒生平不讀一字書但將遊獵誇輕趨胡馬秋
 肥宜白草騎來躡影何矜驕金鞭拂雪行鳴鞘半酣
 呼鷹出遠郊弓彎滿月不虛發雙鶴迸落連飛鶻海
 邊觀者皆辟易猛氣英風振沙磧儒生不及游俠人

白首下帷復何益

行行且遊獵篇

唐孟雲卿盛

少年多武力勇氣冠幽州何以縱心賞馬蹄春草頭
遲遲平原上狐兔奔林丘猛虎忽前逝俊鷹連下鞫
俯身逐南北輕捷固難儔所發無不中失之如我讎
豈惟務馳騁猗爾暴田疇殘殺非不痛古來良有由
和諸葛覽從軍游獵

陳張正見

伏聞遊獵

北周庾信

虞旗喜旦晴獵馬向山橫石關魚貫上山梁鴈翅行
雪平尋兔跡林藪聽雉聲馬嘶山谷響弓寒桑柘鳴
聞弦鳥自落望火獸空驚無風樹卽正不凍水還平
誰知茂陵下願入睢陽城

出獵

唐太宗

楚王雲夢澤漢帝長楊宮豈若因農暇閱武出轅嵩
三驅陳銳卒七萃列材雄寒野霜氣白平原燒火紅
琯戈夏服箭羽騎綠沈弓怖獸潛幽壑驚禽散翠空
長煙晦落景灌木振巖風所爲除民瘼非是悅秋叢

校獵義成喜逢大雪率題九韻以示羣臣

唐玄宗

弧矢威天下旌旗遊近縣
一面施鳥羅三驅教人戰
暮雲積成雪曉色開行殿
皓然原隰同不覺林野變
北風勇士馬東日華組練
觸地銀塵出連山縞鹿見
月兔落高矰星狼下急箭
旣欣盈尺兆復憶磷谿便
歲豐將遇賢俱荷皇天眷

奉和聖製校獵義成喜逢大雪應制

唐張說

文教資武功郊畋閱邦政
不知仁育久徒看禽獸盛

夜霰氛埃滅朝日山川靜
綽仗飛走繁攄絃筋骨勁
帝射參神道龍馳合人性
五靶連一發百中皆先命
勇爵均萬夫雄圖羅七聖
星爲吉符老雪作豐年慶
喜聽行獵詩威神入軍令

冬狩行

北周庾信

三川羽檄馳六郡良家選
觀兵細柳城校獵長楊苑
驚雉逐鷹飛騰猿看箭轉
鳴笳河曲還猶憶南皮返

從駕狩

北周庾信

冬狩出離宮還過獵武功
澗橫偏礙馬山虛絕響弓
更羸承落鴈韓盧鬪蟄熊
猶開三面網誰肯一山重

冬狩

貞觀十六年十二月上獵於驪山登山見圍有斷處顧謂左右曰吾見其不整而不刑則墮軍法刑之則是吾登高臨下以求人之過也乃托以道險引轡入谷以避之

唐太宗

烈烈寒風起慘慘飛雲浮
霜濃凝廣隰冰厚結清流
金鞍多上苑玉勒騁平疇
旌旗四望合罝羅一面求
楚踣爭兕殪秦亡角鹿愁
獸忙投密樹鴻驚起礫州
騎歛原塵靜戈迴嶺日收
心非洛汭逸意在渭濱遊
禽荒非所樂撫轡更招憂

冬狩行

唐杜甫盛

君不見東川節度兵馬雄
校獵亦似觀成功夜發猛

士三千人清晨合圍步驟同
禽獸已斃十七八殺聲
落日迴蒼穹幕前生致九
青兕駱駝嶺巖垂玄熊東
西南北百里間髣髴蹴踏
寒山空有鳥名鸚鵡力不
能高飛逐走蓬肉味不足
登鼎俎胡為見羈虞羅中
春蒐冬狩侯得同使君五
馬一馬驄况今攝行大將
權號令頗有前賢風飄然
時危一老翁十年厭見旌
旗紅喜君士卒甚整肅為
我回轡擒西戎草中狐兔
盡何益天子不在咸陽宮
朝廷雖無幽王禍得不哀
痛塵再蒙嗚呼得不哀痛
塵再蒙

從獵渭川獻詩

唐魏知古初

嘗聞夏太康五事訓禽荒我后成冬狩三驅盛禮張
順時鷹隼擊講事武功揚奔走未成去翺飛豈暇翔
非熊從渭水瑞鶴想陳倉此欲誠難縱茲遊不可常
子雲陳羽獵倍伯諫魚棠得失鑒齊楚仁恩念禹湯
雍熙亮在宥亭毒匪多傷辛甲今為史虞箴遂孔彰

從張丞相獵贈裴迪

唐孟浩然 盛

從禽非吾樂不好雲夢田歲暮登城望偏令鄉思懸
公卿有幾幾車騎何翩翩世祿金章貴官曹幕府連
順時行殺氣飛刃爭割鮮十里留賓館徵聲匝伎筵
高標回落日平楚壓芳煙何意狂歌客從公亦在旃

同羣公出獵海上

唐高適 盛

畋獵自古昔况伊心賞俱偶與羣公遊曠然出平蕪
層陰漲溟海殺氣窮幽都鷹隼何翩翩馳驟相傳呼
豺狼竄榛莽麋鹿懼艱虞高鳥下駢弓困獸鬪匹夫
塵驚大澤晦火燎深林枯失之有餘恨獲者無全軀
咄彼工拙間恨非指縱徒猶懷老氏訓感歎此歡娛

漢武出獵

唐錢起 中

漢家無事樂時邑羽獵千千出九重玉帛不朝金闕
路旌旗長繞彩霞峰且貪原獸輕黃屋寧畏漁人犯
白龍薄暮方歸長樂觀垂楊幾處綠煙濃

校獵曲

唐錢起中

長楊殺氣連雲飛漢主秋畋正掩圍重門日晏紅塵
出數騎胡人獵獸歸

御獵

唐王建中

青山直遶鳳城頭滻水斜分入御溝新教內人唯射
鴨長隨天子苑東遊

看獵

北周王褒

上林冬狩返回中講射歸還登宣曲觀更獵黃山圍
嚴冬桑柘慘寒霜馬騎肥縹纒隨兔起高鷹接雉飛
獨嗟來遠客辛苦倦邊衣

觀獵

唐王昌齡初

角鷹初下秋草稀鐵驄拋鞚去如飛少年獵得平原
兔馬後橫捎意氣歸

觀獵

唐王維盛

風勁角弓鳴將軍獵渭城草枯鷹眼疾雪盡馬蹄輕
忽過新豐市還歸細柳營迴看射鵰處千里暮雲平

觀獵

唐李白盛

太守耀清威乘閑弄晚輝江沙橫獵騎山火繞行圍
箭逐雲鴻落鷹隨月兔飛不知白日暮歡賞夜方歸

觀獵

唐張祐中

正部 卷五十五
殘獵渭城東蕭蕭西北風雪花鷹背上冰片馬蹄中
臂挂捎荆兔腰懸落箭鴻歸來逞餘勇兒子亂彎弓

觀徐州李司空獵

唐張祐中

晚出郡城東分圍淺草中紅旗開向日白馬驟迎風
背手抽金鏃翻身控角弓萬人齊指處一鴈落寒空

連州臘日觀莫徕獵西山

唐劉禹錫中

海天殺氣薄蠻軍步伍囂林紅葉盡變原黑草如燒
圍合繁鉦息禽興大旆控張羅依道口旋犬上山腰
猜鷹慮奮迅驚鹿時跼跳瘴雲四面起臘雪半空消
箭頭餘鵠血鞍傍見雉翹日暮還城邑金笳發麗譙

觀獵

唐韋莊晚

苑牆東畔欲斜暉傍苑穿花兔正肥公子喜逢朝罷
日將軍誇換戰時衣鶻翻錦翅雲中落犬帶金鈴草
上飛直到四郊高鳥盡掉鞍齊向國門歸

觀校獵上淮西相公

唐劉長卿中

龍驤校獵邵陵東野火初燒楚澤空師事黃公千載
後身騎白馬萬人中笳隨晚吹吟邊草箭沒寒雲落
塞鴻三十擁旄誰不羨周郎少小立奇功

觀獵騎

唐司空曙中

纏臂繡綸巾貂裘窄稱身射禽風助箭走馬雪翻塵

金埒爭開道香車為駐輪翩翩不知處傳是霍家親

贈獵騎

唐杜牧晚

已落雙鷗血尚新鳴鞭走馬又翻身憑君莫射南來
鴈恐有家書寄遠人

見征客始還遇獵

北周庾信

貳師新受詔長平正凱歸猶言乘戰馬未得解戎衣
上林遇逐獵宜春暫合圍漢帝熊猶憤秦王雉更飛
故人迎借問念舊始依依河邊一片石不復肯支機

秋獵孟諸夜歸置酒單父東樓觀妓

唐李白盛

傾暉速短炬走海無停川冀餐圓丘草欲以還頽年
此事不可得微生若浮煙駿發誇名駒彫弓控鳴弦
鷹豪魯草白狐兔多肥鮮邀遮相馳逐遂出城東田
一掃四野空喧呼鞍馬前歸來獻所獲炮灸宜霜天
出舞兩美人飄飄若雲仙留歡不知疲清曉方來旋

射

射一作狸首凡二見禮記射義諸侯以狸首為節

曾孫侯氏四正具舉大夫君子凡以庶士小大莫處

御於君所以燕以射則燕則譽見禮記侯推本始封之君故

以曾孫言也四正謂舉正爵以獻賓獻君獻卿獻大夫凡四也四獻皆畢然後射處謂處其職而不來也

以燕以射先行燕禮而後射也則燕則譽燕安也言君臣上下以射而習禮樂則安樂而有名譽也

質參既設執旌既載計反于侯既抗中獲既置弓既

平張四侯且良决拾有常既順乃讓叶如乃揖乃讓

乃躋其堂乃節其行叶寒既志乃張射夫命射射者

之聲御車之旌既獲卒莫見大戴禮投壺篇困學紀聞曰此命射之辭也

大射登歌

隋無名氏

道謚金科照時又玉條明優賢饗禮洽選德射儀成

鑾旗鬱雲動寶軼儼天行中車整三乏司表飾五正

鳴球響高殿華鍾震廣庭烏號傳昔美淇衛著前名

揖讓皆時傑升降盡朝英附枝觀體定杯水覩心平

豐觚既來去燔炙復縱橫欣看禮樂盛喜遇黃河清

射鳥辭

漢明帝東巡有鳥飛鳴乘輿上虎賁郎王吉射中之遂作辭云云帝賜錢百萬

漢王吉

烏烏啞啞引弓射洞左腋陛下壽萬年臣為一作二

千石

射鳶

魏劉楨

鳴鳶弄雙翼飄飄薄青雲我后橫怒起意氣凌神仙

發機如驚焮三發兩鳶連流血灑牆屋飛毛從風旋

庶士同聲贊君射一何妍

落日射熊

梁元帝

促宴引枚鄒中園觀獸侯日度棚陰廣風橫旗影浮
移竿標入箭疊鼓送爭籌附枝時可息言從清夜遊

同管記陸瑜九日觀馬射

陳後主

晴朝麗早霜秋景照堂皇
榦慘風威切荷彫池望荒
樓高看鴈下葉散覺山涼
歇霧含空翠新花濕露黃
飛禽接旆影度日轉鉞光連
翻北幽騎馳射西園傍
勒移碼碯色鞭起珊瑚揚
已同過隙遠更異良弓藏
且觀千里汗仍瞻百步楊
非為從逸賞方追塞外羌

北園射堂新成

北周庾信

軒臺聊可習仙的不難登
轉箭初調筈橫弓先望棚

驚心一鴈落連臂兩猿騰
直知王濟巧誰覺魏舒能
空心不死樹無葉未枯
藤擇賢方至此傳厄欣得朋

玄武門侍射

并序

唐張說

初

開元之初季冬其望天子始御北闕朝羽林軍禮
修事厥後二日乃命紫微黃門九卿六事與熊羆
之將爪牙之臣合宴焉侑以純錦頒以珍器爾其
射棚新成布侯既設梁仗林立帷軒霧布衆官半
酣皇情載悅卷珠箔臨玉除唐弓在手夏箭斯發
應弦屢中屬羽連飛弧矢以來未之有也若夫天
地合道星辰獻儀端視和容內正外直自近而制

遠耀威而觀德無不通神無不極用是射也其惟
聖人乎於時繁雲覆城大雪飛苑天人同澤上下
交歡退食懷恩賦詩頌義凡若干篇

射觀通玄闕兵欄闕御筵雕弧月半上畫的暈重圓
羿后神幽贊靈王法暗傳貫心精四返飲羽妙三連
雪鶴來銜箭星麟下集弦一逢軍宴洽萬慶武功宣

始建射侯

唐韋應物中

男子本懸弧有志在四方虎竹忝明命熊侯始張皇
賓登時事畢諸將備戎裝星飛的屢破鼓譟武更揚
曾習鄒魯學亦陪鴛鷺翔一朝願投筆世難激中腸

和王懷州觀西營秋射

唐耿湜中

謝公親校武草碧露漫漫落葉停高駕空林滿從官
迎籌皆疊鼓揮箭或移竿名借三軍勇功推百中難
主皮山郡晚飲算柳營寒明日開鈴閣新詩雙玉盤
觀衛尚書九日對中使射破 唐戎昱中
盛宴傾黃菊殊私降紫泥月營開射圃霜旆拂晴霓
出將三朝貴彎弓五善齊腕迴金鏃滿的破綠弦低
勇氣干牛斗歡聲震鼓鼙忠臣思報國更欲取關西

觀騎射

唐李益中

邊頭射鵰將走馬出中軍遠見平原上翻身向暮雲

射虎行

唐王建中

自去射虎得虎歸官差射虎得虎遲獨行以死當虎
命兩人因疑終不定朝朝暮暮空手迴山下綠苗成
道徑遠立不敢汗箭鏃聞死還來分虎肉惜畱猛虎
著深山射殺恐畏終身閑

射鵬騎

唐馬戴晚

蕃面將軍著鼠裘酣歌衝雪在邊州獵過黑山猶走
馬寒鵬射落不回頭

李波小妹歌

魏書曰廣平人李波宗族疆盛殘
掠不已公私咸患百姓為之語云

云刺史李安世設方畧
誘波等殺之州內肅然

李波小妹字雍容褰裙逐馬如卷蓬左射右射必疊
雙婦女尚如此男子安可逢

○觀兵

廣陵觀兵

一作至廣陵於馬上作魏志黃初六
年十月行幸廣陵故城臨江觀兵戎

卒十餘萬旌旗數百
里帝於馬上為詩曰

魏文帝

觀兵臨江水水流何湯湯戈矛成山林玄甲耀日光
猛將懷暴怒膽氣正縱橫誰云江水廣一葦可以航
不戰屈敵虜戢兵稱賢良古公宅岐邑實始翦殷商
孟獻營虎牢鄭人懼稽顙充國務耕殖先零自破亡
興農淮泗間築室都徐方量宜運權畧六軍咸悅康

豈如東山詩悠悠多憂傷

宿溫城望軍營

唐駱賓王初

虜地寒膠折邊城夜柝聞兵符關帝闕天策動將軍
塞靜胡笳徹沙明楚練分風旗翻翼影霜劍轉龍文
白羽搖如月青山斷若雲煙踈疑卷幔塵滅似銷氛
投筆懷班業臨戎想召勲還應雪漢恥持此報明君

觀兵

唐杜甫盛

北庭送壯士貔虎數猶多精銳舊無敵邊隅今若何
妖氛推白馬元帥待彫戈莫守鄴城下斬鯨遼海波

觀安西兵過赴關中待命

唐杜甫盛

四鎮富精銳摧鋒皆絕倫還聞獻士卒足以動風塵
老馬夜知道蒼鷹饑著人臨危經久戰用意始如神

二

竒兵不在衆萬馬救中原談笑無河北心肝奉至尊
孤雲隨殺氣飛鳥避轅門竟日留歡樂城池未覺喧

登邯鄲洪波臺置酒觀發兵

唐李白盛

我把兩赤羽來遊燕趙間天狼正可射感激無時閑
觀兵洪波臺倚劍望玉關請纓不繫越且向燕然山
風引龍虎旗歌鐘昔追攀擊筑落高月投壺破愁顏
遙知百戰勝定掃鬼方還

九日登巴陵置酒望洞庭

水

唐李白

盛

九日天氣清登高無秋雲造化闢川嶽了然楚漢分
長風鼓橫波合沓感龍文憶昔傳遊豫樓船壯橫汾
今茲討鯨鯢旌旆何繽紛白羽落酒樽洞庭羅三軍
黃花不掇手戰鼓遙相聞舞劍轉頽陽當時日停曛
酣歌激壯士可以摧妖氛齷齪東籬下淵明不足羣

涇州觀元戎出師

唐戎昱

中

寒日征西將蕭蕭萬馬叢吹笳覆樓雪祝纛滿旗風
遮虜黃雲斷燒羌白草空金鏡肅天外玉帳靜霜中
朔野長城閉河源舊路通衛青師自老魏絳賞何功

槍壘依沙迴轅門壓塞雄燕然如可勒萬里願從公

蒜山津觀發軍

唐許渾

晚

羽檄徵兵急轅門選將雄犬羊憂破竹貔虎極飛蓬
定繫猖狂虜何須矍鑠翁更探黃石略重振黑山功
別馬嘶營柳驚鳥散井桐低星連寶劍殘月讓雕弓
浪曉戈鋌裏山晴鼓角中甲開魚照水旗颺虎拏風
去想金河遠行聞一作知玉塞空漢庭應有問師律在
元戎

○征伐

行軍併入

命將出征歌

晉張華

重華隆帝道戎蠻或不賓徐夷興有周鬼方亦違殷
 今在聖明世寇虐動四垠豹狼染牙爪羣生號穹旻
 元帥統方夏出車撫涼秦衆貞必以律臧否實在人
 威信加殊類踈逖思自親單醪豈有無一作味挾纊感
 至仁武功尚止戈七德美安民遠跡由斯舉永世無
 風塵

北伐

宋孝武帝

表裏跨原隰左右御川梁月羽皎素魄皇旗赭赤光
 詠霍將軍北伐

梁虞羲

擁旄爲漢將汗馬出長城長城地勢險萬里與雲平

涼秋八九月虜騎入幽并飛狐白日晚瀚海愁雲生
 羽書時斷絕刁斗晝夜驚乘墉揮寶劔蔽日引高旂
 雲屯七萃士魚麗六郡兵胡笳關下思羌笛隴頭鳴
 骨都先自讐日逐次亡精玉門罷斥堠甲第始修營
 位登萬庾積功立百行成天長地自久人道有虧盈
 未窮激楚樂已見高臺傾當令麟閣上千載有雄名

南征

陳蘇子卿

一朝遊桂水萬里別長安故鄉夢中近邊愁酒上寬
 劔鋒但須利戎衣不畏單南中地氣暖少婦莫愁寒

李雲南征蠻詩

并序

唐高適

盛

正音 卷五十五
天寶十一載有詔伐西南夷右相楊公兼節制之
寄乃奏前雲南太守李宓涉海自交趾擊之道路
險艱往復數萬里蓋百王所未通也十二載四月
至於長安君子是以知廟堂使能而李公効節適
忝斯人之舊因賦是詩

聖人赫斯怒詔伐西南戎肅穆廟堂上深沈節制雄
遂令感激士得建非常功料死不料敵顧恩寧顧終
鼓行天海外轉戰蠻夷中梯巘近高鳥穿林經毒蟲
鬼門無歸客北戶多南風蜂蠆隔萬里雲雷隨九攻
長驅大浪破急擊羣山空餉道忽已遠懸軍垂欲窮

精誠動白日憤薄連蒼穹野食掘田鼠晡餐兼爨僮
收兵列亭堠拓地彌西東臨事恥苟免履危能飭躬
將星獨照耀邊色何溟濛瀘水夜可涉交州今始通
歸來長安道召見甘泉宮廉藺若未死孫吳知暗同
相逢論意氣慷慨謝深衷

東征行

唐王建中

桐柏水西賊星落梟雛夜飛林木惡相國刻日波濤
清當朝自請東南征舍人爲賓侍郎副曉覺蓬萊欠
珮聲玉階舞蹈謝旌節生歿向前山可穴同時賜馬
并賜衣御樓看帶弓刀發馬前猛士三百人金書左

正音
右紅旗新司庖常膳皆得對好事將軍封爾身男兒
生殺在手裏營門老將皆憂死瞳瞳白日當南山不
立功名終不還

征西將

唐張籍中

黃沙北風起半夜又翻營戰馬雪中宿探人冰上行
深山旗未展陰磧鼓無聲幾道征西將同收碎葉城

東兵

唐杜牧晚

上黨爭爲天子眷邯鄲四十萬秦坑狂童何者欲專
地聖主無私豈玩兵玄象森羅搖北落詩人章句詠
東征雄如馬武皆彈劔少似終軍亦請纓屈指廟堂

無失策垂衣堯舜待昇平羽林東下雷霆怒楚甲南
來組練明卽墨龍文光照曜常山蛇陣勢縱橫落鷗
都尉萬人敵黑稍將軍一鳥輕漸見長圍雲欲合可
憐窮壘帶猶縈凱歌應是新年唱便逐春風浩浩聲

飲馬長城窟

魏文帝

汎舟橫大江討彼犯荆虜武將齊貫鉀征人伐金鼓
長戟十萬隊幽冀百石弩發機若雷電一發連四五

汎舟橫大江三首

梁簡文帝

滄波白日暉遊子出王畿旁望重山轉前觀遠帆稀
廣水浮雲吹江風引夜衣旅鴈同洲宿寒鳥夾浦飛

正音
行客誰多病

一作興

當念早旋歸

二

隴西四戰地羽檄歲時聞
護羌擁漢節校尉立元勳
石門留鐵騎冰城息夜軍
洗兵逢驟雨送陣出黃雲
沙長無止泊水脉屢縈分
當思勒彝鼎無用想羅裙

三

悠悠縣旆旌知向隴西行
滅竈驅前馬銜枚進後兵
沙飛朝似幕雲起夜疑城
迴山時阻路絕水亟稽程
往年郅支服今歲單于平
方歡凱樂盛飛蓋滿西京

分兵救朔方

原作出自
薊北門

宋鮑照

羽檄起邊亭烽火入咸陽
徵師

一作騎

屯廣武分兵救

朔方嚴秋筋竿勁虜陣精
且彊天子按劍怒使者遙
相望鴈行緣石徑魚貫度
飛梁簫鼓流漢思
一作旌
甲被胡霜疾風衝塞起
沙礫自飄揚馬毛縮如蝟
角弓不可張時危見臣節
世亂識忠良投軀報明主
身死爲國殤

戰城南

梁吳筠

蹀躞青驪馬往戰城南
畿五歷魚麗陣三入九重圍
名懼武安將血汗秦王衣
爲君意氣重無功終不歸

戰城南

陳張正見

五音
卷五十五
三十三
薊北馳胡騎城南接短兵雲屯兩陣合劍聚七星明
旗交無復影角憤有餘聲戰罷披軍策還嗟李少卿

戰城南

唐盧照鄰

初

將軍出紫塞冒頓在烏貪笳喧鴈門北陣翼龍城南
琯弓夜宛轉鐵騎曉驂驪應須駐白日為待戰方酣

戰城南

唐楊炯

初

塞北途遼遠城南戰苦辛幡旗如鳥翼甲冑似魚鱗
凍水寒傷馬悲風愁殺人寸心明白日千里暗黃塵

戰城南

唐徐九臯

盛

塞北狂胡旅城南敵漢圍巉巖一鼓氣拔利五兵威

虜騎瞻山哭王師拓地飛不應須寵戰當遂勒金徽

征役

原作古意

梁吳均

雜虜寇銅鞮征役去三齊扶山翦疏勒傍海掃沈黎
劍光夜揮電馬汗晝成泥何當見天子畫地取關西

二

匈奴數欲盡僕在玉門關蓮花穿劍鏢秋月掩刀環
春機思一作鳴窈窕夏鳥鳴一作思綿蠻中人坐相望狂
夫終未還

發白馬

白馬津名

梁費昶

家本樓煩俗召募羽林兒怖羌角觝戲習戰昆明池

弓殘不復挽劍衣恒露鉞一辭豹尾內長別屬車垂
白馬今雖發黃河未結澌寄言閨中婦逢春心勿移

發白馬

唐李白盛

將軍發白馬旌節度黃河簫鼓聒川嶽滄溟湧濤波
武安有振瓦易水無寒歌鐵騎若雪山飲流涸滹沱
揚兵獵月窟轉戰略朝那倚劍登燕然邊鋒列嵯峨
蕭條萬里外耕作五原多一掃清大漠包虎戢金戈

次天元十載華陰發兵作時有郎官點發

唐儲光羲盛

鬼方生獫狁時寇盧龍營帝念霍嫖姚詔發咸林兵

天星下文閣簡師臨我城三陌觀勇夫五餌謀長纓
雷野大車發震雲靈鼓鳴太華色蒼蒼清渭風交橫
胡馬悲雨雪詩人歌旆旌閼氏爲女奴單于作邊氓
神皇麒麟閣大將不書名

奉和杜相公初夏發京城作唐岑參盛

按節辭黃閣登壇戀赤墀銜恩期報主授律遠行師
野鵲迎金印郊雲拂畫旗叨陪幕中客敢和出車詩

奉和杜相公發益昌唐岑參盛

相國臨戎別帝京擁旄持節遠橫行朝登劍閣雲隨
馬曉渡巴江雨洗兵山花萬朶迎征蓋川柳千條拂

去旌暫到蜀城應計日須知明主待持衡

行軍

唐李白盛

騮馬新誇白玉鞍戰罷沙場月色寒城頭鐵鼓聲猶
振匣裏金刀血未乾

出軍

唐戎昱中

龍繞旌竿獸滿旗翻營乍似雪中移中軍一隊三千
騎盡是并州游俠兒

出師

唐司空曙中

月沒遼城暗出師雙龍金角曉天悲黃塵滿目隨風
散不認將軍鷲尾旗

侍宴餞臨川王北伐應詔

梁王筠

金版韜英玉牒蘊精帝德乃武王威有征軒集弧矢
夏陳干戚周騫戎車漢馳羽檄我皇俊聖千年踵武
德洞十一作千門威加八柱金正圯德水行失道胡馬
南牧戎徒西保薦食伊瀍整居豐鎬金關一作閣揚塵
銅臺茂草命彼膳夫爰詔協律樂賦出車絃操吉日
玉饌駢羅瓊漿泛溢聖德溫溫賓儀秩秩

送衛王南征

北周庾信

望水初橫陣移營寇未降風塵馬足起先暗廣陵江
送趙二尚書彥昭北伐

唐張說初

虜地河水合邊城備此時兵連紫關路將舉白雲司
題劔榮中貴銜珠盛出師日華光組練風色焰旌旗
投筆罇前起橫戈馬上辭梅花吹別引楊柳賦新詩

同諸公送李雲南伐蠻

唐儲光羲盛

昆明濱滇池蠢爾敢逆常天星耀鐵鎖弔彼西南方
冢宰統元戎太守齒軍行囊括千萬里矢謨在廟堂
耀耀金虎符一息到炎荒蒐兵自交趾芟舍出瀘陽
羣山高嶄巖凌越如鳥翔封豕驟踰伏巨象遙披攘
迴谿深天淵揭厲踰舟梁玄武掃孤蛟蛟龍除方良
雷霆隨神兵礪磕動穹蒼斬伐若草木繫縲同犬羊

餘醜隱弭河啁啾亂行藏君子惡薄險王師恥重傷
廣車設置梁太白收光芒邊吏靜縣道新書行紀綱
劔關掉鞅歸武弁朝建章龍樓加命服獬豸擁秋霜
邦人頌靈旗側聽何洋洋京觀在七德休哉我神皇

走馬川行奉送出師西征

唐岑參盛

君不見走馬川行雪海邊平沙莽莽黃入天輪臺九
月風夜吼一川碎石大如斗隨風滿地石亂走匈奴
草黃馬正肥金山西見煙塵飛漢家大將西出師將
軍金甲夜不脫半夜軍行戈相撥風頭如刀向如割
馬毛帶雪汗氣蒸五花連錢旋作冰幕中草檄硯水

正部 卷五十五
凝虜騎聞之心膽懾料知短兵不敢接車師西門佇
獻捷

輪臺歌送封大夫出師西征 唐岑參 盛

輪臺城頭夜吹角輪臺城北旄頭落羽書昨夜過渠
黎單于已在金山西戍樓西望煙塵黑漢兵屯在輪
臺北上將擁旄西出征平明吹笛大軍行四邊伐鼓
雪海湧三軍大呼陰山動虜塞兵氣連雲屯戰場白
骨纏草根劔河風急雲片闊沙口石凍馬蹄脫亞相
勤王甘苦辛誓將報主靜邊塵古來青史誰不見今
見功名勝古人

送張將軍征西

唐錢起 中

長安少年唯好武金殿承恩爭破虜沙場烽火隔天
山鐵騎征西幾歲還戰處黑雲霾瀚海愁中明月度
陽關玉笛聲悲離酌晚金方路極行人遠計日霜戈
盡敵歸回首戎城空落暉始笑子卿心計失徒看海
上節旄稀

送秦光祿北征

唐李賀 中

北虜膠堪折秋沙亂曉輦髯胡頻犯塞驕氣似橫霓
灞水樓船渡營門細柳開將軍馳白馬豪彥騁雄材
箭射攬槍落旗懸日月低榆稀山易見甲重馬頻嘶

正部 卷五十五
天遠星光沒沙平草葉齊風吹雲路火雪汗玉關泥
屢斷呼韓頸曾燃董卓臍太常猶舊寵光祿是新躋
寶玦騏驎起銀壺狒狒啼桃花連馬發綵絮撲鞍來
呵臂縣金斗當唇注玉壘清蘇和碎蟻紫膩卷浮杯
虎韜先蒙馬魚腸且斷犀趁趨西旅狗威額北方奚
守帳燃香暮看鷹永夜棲黃龍就別鏡青塚念陽臺
周處長橋役侯調短弄哀錢塘階鳳羽正室擘鸞釵
丙子攀琪樹羌兒奏落梅今朝擎劔去何日刺蛟迴
送劉將軍入關討賊
唐李山甫晚

世人多恃武何者是英雄欲滅黃巾賊須憑黑稍公
指星憂國計望氣識天風明日凌雲上期君第一功
○從征

從征行方頭山

晉袁宏

峩峩太行凌虛抗勢天嶺交氣窈然無際澄流入神
玄谷應契四象悟心幽人來憇

從征

宋傅亮

息徒西楚佇楫舊鄉止猶岳立動則雲翔烈烈羣師
星言啓行汎舟掩河秣馬登芒

從武帝平閩中

宋傅亮

鞠旅揚城大蒐徐方旂旌首路元戎啓行弭一作楫

洪河總轡崇岡

從戎曲

齊謝朓

選旅辭輟軒弭節赴河源日起霜戈照風迴連騎翻
紅塵朝夜合黃沙萬里昏寥戾清笳轉蕭條邊馬煩
自勉輟耕願征役去何言

從蕭驃騎新帝壘

梁江淹

鯢妖毀王度虹氣咀王猷上宰軫靈畧宏威肅廣謀
綿嶮冒戈堞乘嶠架烽樓燕兵歌越水代馬思吳州
金笳夜一遠明月信悠悠雲色被江出煙光帶海浮
開襟夾蒼宇拓遠局溟洲折日承丹谷總駕臨青丘

側待颺霧晏方從畎壑遊

劍客遠從征

原作度關山

陳張正見

關山度曉月劍客遠從征雲中出迴陣天外落奇兵
輪摧偃去節樹倒礙懸旌沙揚折坂暗雲積榆谿明
馬倦時銜草人疲屢看城寒隴胡笳澀空林漢鼓鳴
還聽嗚咽水併切斷腸聲

從北征

北齊裴讓之

沙漠胡塵起關山烽燧驚皇威奮武略上將總神兵
高臺朔風駛絕野寒雲生匈奴定遠近壯士欲橫行
從北征

北齊祖珽

正音 卷五十五
翠旗臨塞道靈鼓出桑乾祁山斂雰霧瀚海息波瀾
戍亭秋雨急關山朔氣寒方繫單于頸歌舞入長安
侍從徐國公殿下軍行 北周庾信

八風占陣氣六甲候兵韜置府仍張幕麾軍卽秉旄
長旗臨廣武烽火照城臯巡寒重挾纊酌水勝單醪
陣後雲逾直兵深星轉高電燄驅龍馬山精鏤寶刀
塞迴翻榆葉關寒落鴈毛旣得從神武何須念久勞

西征軍行遇風

唐崔融初

北風捲塵砂左右不相識颯颯吹萬里昏昏同一色
馬煩不敢進人急未遑食草木春更悲天景竄相匿

夙齡慕忠勇雅尚存孤直覽史懷浸驕讀詩歎孔棘
及茲戎馬地忝從書記職兵氣騰北荒軍聲振西極
坐覺威靈遠行看稜氛息愚臣何以報倚馬申微力
得柳員外書封寄近詩書中兼報新主行營兵

馬因代書戲荅

唐獨孤及盛

郎官作椽心非好儒服臨戎政已聞說劔嘗宗漆園
吏戒嚴應笑棘門軍遙知抵掌論黃道時復吟詩向
白雲百越待君言卽叙相思不敢愴離羣

行營酬呂侍御時尚書問罪襄陽軍次漢東境

上侍御以州鄰寇賊復有水火迫於征稅詩

以見諭

唐劉長卿中

不敢淮南卧來趨漢將營受辭瞻左鉞扶疾拜前旌
并稅鶉衣樂壺漿鶴髮迎水歸餘斷岸烽至掩孤城
晚日歸千騎秋風合五兵孔璋才素健早晚檄書成
從軍北征

唐李益中

天山雪後海風寒橫笛偏吹行路難磧裏征人三十
萬一時回向月明看

東征荅朝臣相送

唐陳子昂初

平生白雲意疲薶媿為雄君王謬殊寵旌節此從戎
接繩當繫虜單馬豈邀功孤劍將何託長謠塞上風

送著作佐郎崔融等從梁王東征并序

唐陳子昂初

古者涼風至白露下天子命將帥訓甲練兵將以
外威羌戎內輯中夏時義遠矣自我大君受命百
蠻蟻伏匈奴舍蒲萄之宮越裳重翡翠之貢虎符
不發象胥攸同寔欲高議靈臺偃兵天下而林胡
遺孽瀆亂邊昨驅蚊蚋之師忽雷霆之伐乃竊海
裔弄燕陲皇帝哀北鄙之人惟其辛螫以東征之
義降彼偏裨猶恐威令未孚亭塞可留岐路方乖
關山成恨嗟乎朝廷好入期富貴于崇朝林嶺吾

棲學神仙而未畢青霞路絕朱紱途遙言此會之
何時願相逢而誰伐永懷千古豈知口者之交凡
我三人盍崇不朽之迹斯文未喪題之此山同疏

四韻云爾

金天方肅殺白露始專征王師非樂戰之子慎佳兵
海氣侵南郡邊風掃北平莫賣盧龍塞歸邀麟閣名
夏日都門送司馬員外逸客孫員外佺北征

唐李义初

日逐滋南寇天威撫北陲析珪行仗節持印且分麾
羽檄雙鳧去兵車駟馬馳虎旗縣氣色龍劍抱雄雌

候月期戡翦經時念別離坐聞關隴外無復引弓兒

夏日都門送司馬員外逸客孫員外佺北征

王為元帥魏大夫元忠為副

唐沈佺期初

二庭追虜騎六月動周師廟略天人授軍麾相國持
復言徵二妙才命重當時畫省連征橐橫門共別詞
雲迎出塞馬風捲渡河旗計日方夷寇旋聞杖杜詩

送盧管記僊客北伐

唐沈佺期初

羽檄西北飛交城日夜圍廟堂盛徵選戎幕生光輝
鴈行度幽谷馬首向金微湛湛山川暮蕭蕭涼風稀
餞途予憫默赴敵子英威今日揚朱淚無將灑鐵衣

送白利從金吾董將軍西征 唐李白盛

西羌延國討白起佐軍威劔決浮雲氣弓彎明月輝
馬行邊草綠旌卷曙霜飛抗手凜相顧寒風生鐵衣

送梁公昌從信安王北征 唐李白盛

入幕推英選捐書事遠戎高談百戰術鬱作萬夫雄
起舞蓮花劔行歌明月宮將飛天地陣兵出塞垣通
祖席留丹影征麾拂綵虹旋應獻凱入麟閣佇深功
貽鼓吹李丞時信安王北伐李公王之所器者

唐儲光義初

北伐昧天造王師示有征轅門統元律帝室命宗英

靈威方首事伏鉞按邊城膏雨被春草黃雲浮太清
文儒託後乘武旅趨前旌出車發西洛營軍臨北平
曰予深固陋志氣頗縱橫常思驃騎幕願逐嫖姚兵
維賢美無度海內依揚聲河間舊相許車騎日逢迎
折節下謀士深心論客卿忠言雖未列庶以知君誠

送陸員外 唐王維盛

郎署有伊人居然古人風天子顧河北詔書除征東
拜手辭上官緩步出南宮九河平原外七國薊門中
陰風悲枯桑古塞多飛蓬萬里不見虜蕭條胡地空
無爲費中國更欲邀奇功遲遲前相送握手嗟異同

武部 卷五十五
行當封侯歸肯訪南山翁

詩雋類函卷五十六

東吳俞安期彙纂

宣城梅鼎祚增定

金明蕭如薰訂校

武部二

從軍

赴軍

監軍附

送軍

○從軍

從軍詩五首

魏志曰建安二十年三月公西征張魯魯及五子降十二年自南

鄭是行也侍中王粲作五言詩以美其事

魏王粲

從軍有苦樂但問所從誰所從神且武焉得久勞師
相公征關右赫怒震天威一舉滅獯虜再舉服羌夷
西收邊地賊忽若俯拾遺陳賞越丘山酒肉踰川坻

軍中多沃饒人馬皆溢肥徒行兼乘還空出有餘資
 拓地三千里往返一如飛歌舞入鄴城所願獲無違
 晝日處大朝日暮薄言歸外參時明政內不廢家私
 禽獸憚為犧良苗實已揮竊慕負鼎翁願厲朽鈍姿
 不能效沮溺相隨把鋤犁熟覽夫子詩信知所非言
 涼風厲秋節司典告詳刑我君順時發桓桓東南征
 汎舟蓋長川陳卒被隰垆征夫懷親戚誰能無戀情
 拊衿倚舟檣眷眷思鄴城哀彼東山人喟然感鸛鳴
 日月不安處人誰獲恒一作常寧昔人從公旦一徂輒
 三齡今我神武師暫往必速平棄余親睦恩輸力竭

忠貞懼無一夫用報我素餐誠夙夜自悝

普庚反

性思

逝若抽縈將秉先登羽豈敢聽金聲

建安二十二年
祭從曹公征吳

此下四首蓋
征吳作也

從軍征遐路討彼東南夷方舟順廣川薄暮未安坻
 白日半西山桑梓有餘暉蟋蟀夾岸鳴孤鳥翩翩飛
 征夫心多懷悽一作惻愴令吾悲下船登高防草露露
 我衣迴身赴牀寢此愁當告誰身服干戈事豈得念
 所私即戎有授命茲理不可違

朝發鄴都橋暮濟白馬津逍遙河隄上左右望我軍
 連舫踰萬艘帶甲千萬人率彼東南路將定一舉勲

籌策運帷幄一由我聖君恨我無時謀譬諸具官臣
鞠躬中堅內微畫無所陳許歷為完士一言猶一作獨
敗秦我有素餐責誠愧伐檀人雖無鉛刀用庶幾奮
薄身

悠悠涉荒路靡靡我心愁四望無煙火但見林與丘
城郭生榛棘蹊徑無所由桓蒲竟廣澤葭葦夾長
流日夕涼風發翩翩漂吾舟寒蟬在樹鳴鸛鵠摩天
游客子多悲傷淚下不可收朝入譙郡界曠然消人
憂雞鳴達四境黍稷盈原疇館宅充鄜里士女滿莊
廛一作廛音仇自非賢聖國誰能享斯休詩人美樂土雖

客猶願留

從軍原作古詩

漢無名氏

十五從軍征八十始得歸道逢鄉里人家中有阿誰
遙望是君家松柏冢纍纍兔從狗竇入雉從梁上飛
中庭生旅穀井上生旅葵烹穀持作飯采葵持作羹
羹飯一時熟不知貽阿誰出門東向望淚落沾我衣

從軍行二首

魏左延年

苦哉邊地人一歲三從軍三子到燉煌二子詣隴西
五子遠鬪去五婦皆懷身

又見初學記

武部 卷五
從軍何等樂一驅乘雙駃鞍馬照人白龍驤自動作

從軍行

晉陸機

苦哉遠征人飄飄一作窮四遐南陟五嶺巔北戍長

城阿深一作谷邈一作無底崇山鬱嵯峩奮臂攀喬

木振迹涉流沙隆暑固已慘涼風嚴且苛夏條集一作

鮮藻寒水結衝波胡馬如雲屯越旗亦星羅飛鋒

無絕影鳴鏑自相和朝食一作不免胄夕息常負戈

苦哉遠征人撫心悲如何

從軍

原作雜詩

晉張協

此鄉非吾地此郭非吾城羈旅無定心翩翩如懸旌

出覩軍馬陣入聞鞞鼓聲常懼羽檄飛神武一朝征

長鋏鳴鞘中烽火列邊亭捨我衡門衣更被縵胡纓

疇昔懷微志惟幕竊所經何必操干戈堂上有竒兵

折衝樽俎間制勝在兩楹巧遲不足稱拙速乃垂名

從軍行

宋顏延之

苦哉遠征人畢力幹時艱秦初略揚越漢世爭陰山

地廣旁無界岳阿上虧天嶠霧下高鳥冰沙固流川

秋飈冬未至春液夏不涓閩烽指荆吳胡埃屬幽燕

橫海咸飛驪絕漠皆控弦馳驛發章表軍書交塞邊

接鏑赴陣首卷甲起行前羽檄馳無絕旌旗晝夜懸

卧伺金柝響起候亭燧煙逝矣遠征人惜哉私自憐
和王僧辯從軍

梁元帝

寶劍飾龍淵長虹畫彩旃山虛和鏡管水淨寫樓船
連雞隨火度燧象帶烽燃洞庭晚風急瀟湘夜月圓
荀令多文藻臨戎賦雅篇

從軍行

梁簡文帝

雲中亭障羽檄驚甘泉烽火通夜明貳師將軍新築
營嫖姚校尉初出征復有山西將絕世愛雄名三門
應遁甲五壘學神兵白雲隨陣一作旆色蒼山峇鼓聲
迤邐觀鶯翼參差覩鴈行先平小月陣却滅大宛城

善馬還長樂黃金付水衡小婦趙人能鼓瑟侍婢初
笄解鄭聲庭前桃花一作飛已合必應紅妝來

起迎一作起見迎

從軍行

梁簡文帝

貳師惜善馬樓蘭貪漢財前年出右地今歲討輪臺
魚雲望旗聚龍沙隨陣開冰城朝浴鐵地道夜銜枚
將軍號令密天子璽書催何時返舊里遙見下機來

從軍行

梁戴嵩

長安夜刺閨夜警按刺於門也胡騎白銅鞮詔書發隴右召
募取關西劍懸三尺鞘鎧累七重犀督軍鳴戰鼓巡

夜數更鞞侵星出柳塞際晚入榆谿秦涇含藥鳩晉
火逐飛雞通泉開地道望敵豎雲梯陰山日不暮長
城風自淒弓寒折錦鞬鞬字林云雜錦以被弓也馬凍滑斜蹄燕
旗竿上脆羌笛管中嘶登山試下趙憑軾且平齊當
今函谷上唯用一丸泥

從軍行

梁沈約

惜哉征夫子憂恨良獨多浮天出鯁海東馬渡交河
雪縈九折燈風卷萬里波維舟無夕島秣驥乏平莎
陵濤富驚沫援木闕垂蘿江颺鳴壘嶼流雲照層阿
玄埃晦朔馬白日照吳戈寢興動征怨寤寐起還歌

晨裝豈輟警夕壘詎淹和苦哉遠征人悲矣將如何

從軍行

梁劉孝儀

冠軍親挾射長平自合圍木落離弓燥氣秋征馬肥
賢王皆屈膝幕府復申威何謂從軍樂徃返速如飛

從軍行

梁吳均

男兒亦可憐立功在北邊陣頭橫却月馬腹帶連錢
懷戈發隴坻乘凍至遼川微誠君不愛終自直如弦

擬李都尉陵從軍

梁江淹

樽酒送征人踟躕在親宴日暮浮雲滋握手淚如霰
悠悠清水川嘉魴得所薦而我在萬里結友一作不

相見袖中有短書願寄雙飛鷺

從軍

原作古意
報表功曹

梁江淹

從軍出隴北長望陰山雲涇渭各異流恩情於此分
故人贈寶劍鏤以瑤華文一言鳳獨立再說鸞無羣
何得晨風起悠哉凌翠氛黃鵠去千里垂涕為報君

從軍行

梁蕭子範

左角明王侵漢邊輕薄良家惡少年縱橫向沮澤凌
厲取山田黃塵不見影飛蓬恒滿天邀功封浞野竊
寵劫一作祁連春風春月將進酒妖姬舞女亂君前

同盧記室從軍

北周庾信

河圖論陣氣金匱辨星文地中鳴鼓角天上下將軍
函犀恒七屬絡鐵本千羣飛梯聊度絳合弩暫凌汾
寇陣先中斷妖營即兩分連烽對嶺度嘶馬隔河聞
箭飛如疾雨城崩似壞雲英王於此戰何用武安君
從軍行
北周趙王括
遼東烽火照甘泉薊北亭障接燕然水凍菖蒲未生
節關寒榆莢不成錢

從軍行二首

北周王褒

兵書久閑習征戰數曾經講戎平樂觀學戲一作羽
林亭西征度疏勒東驅出井陘牧馬濱長渭營軍毒

正部 卷五十六
上涇平雲如陣色半月類城形羽書封信璽詔使動
流星對岍流沙白綠河柳色青將幕恒臨斗旌門常
背邢勲封瀚海石功勒燕然銘兵勢因麾下軍圖送
掖庭誰憐下玉筋向暮掩金屏

黃河流急驄馬遠征人谷望河陽縣橋渡小平津
年少多游俠結客好輕身代風愁櫪馬胡霜宜角筋
羽書勞警急邊鞍倦苦辛康居因漢使盧龍稱魏臣
荒戍惟看柳邊城不識春男兒重意氣無爲羞賤貧

從軍

北齊高昂

春甲長驅不可息六日六夜三度食初時口言作虎

牢更被處置河橋北迴首絕望便蕭條悲來雪涕還
自抑

從軍行

陳張正見

胡兵屯薊北漢將起山西故人輕百戰聊欲定三齊
風前噴盡角雲上舞飛梯鴈塞秋聲遠龍沙雲路迷
燕然自可勒函谷詎須泥

從軍五更轉五首

陳伏知道

一更刁斗鳴校尉連連城遙聞射鵰騎懸憚將軍名

二

二更愁未央高城寒夜長試將弓學月聊持劍比霜

三

三更夜警新橫吹獨吟春疆聽梅花落誤憶柳園人

四

四更星漢低落月與雲齊依稀北風裏胡笳雜馬嘶

五

五更催送籌曉色映山頭城烏初起堞更人悄下樓

從軍行

隋盧思道

朔方烽火照甘泉長安飛將出祁連犀渠玉劔良家子白馬金羈俠少年平明偃月屯右地薄暮魚麗逐左賢谷中石虎經銜箭山上金人曾祭天天涯一去

無窮已薊門迢遞三千里朝見馬嶺黃沙合夕望龍

城陣雲起庭中奇樹已堪攀塞外征人殊未還白雪

初下天山外浮雲直上五原間關山萬里不可越誰

能坐對芳菲月流水本自斷人腸堅冰舊來傷馬骨

邊庭節物與華異冬霰秋霜春不歇長風蕭蕭渡水

來歸鴈連連映天沒從軍行軍行萬里出龍庭單于

渭橋今已拜將軍何處覓功名

從軍行

隋明餘慶

三邊烽亂驚十萬且橫行風卷常山陣笳喧細柳營

劔花寒不落弓月曉逾明會取淮南一作河西地持作朔

方城

從軍原作木蘭詩

古辭

唧唧復唧唧一作促織木蘭當戶織不聞機杼聲唯

聞女歎息問女何所思問女何所憶女亦無所思女

亦無所憶昨夜見軍帖可汗點大兵軍書十二卷卷

卷有耶名阿耶無大兒木蘭無長兄願為市鞍馬從

此替耶征東市買駿馬西市買鞍韉南市買轡頭北

市買長鞭朝辭耶孃去暮宿黃河邊不聞耶孃喚女

聲但聞黃河流水鳴濺濺旦辭黃河去暮至黑山頭

不聞耶孃喚女聲但聞燕山胡騎聲一作啾啾萬里

赴戎機關山度若飛朔氣傳金柝寒光照鐵衣將軍

百戰死壯士十年歸歸來見天子天子坐明堂策勲

十二轉賞賜一作賜物百千疆可汗問所欲木蘭不用尚

書郎一作欲與木蘭願馳千里足西陽雜俎云願送

兒還故鄉耶孃聞姊來出郭相扶將阿姊聞妹來一作

阿姊聞當戶理紅妝小弟聞姊來磨刀霍霍向猪羊

開我東閣門坐我西間牀脫我戰時袍著我舊時裳

當牕理雲鬢對鏡帖花黃出門看火伴火伴始一作

驚惶同行十二年不知木蘭是女郎雄兔兔脚撲朔一作

握雌兔眼迷離兩兔傍地走安能辨我是雄雌

從軍

古辭

卷五十一

從軍

從軍

原作木蘭詩

古辭

木蘭抱杼嗟借問復為誰欲聞所慼慼感激彊其顏
 老父隸兵籍氣力日衰耗豈足萬里行有子復尚少
 胡沙沒馬足朔風裂人膚老父舊羸病何以彊自扶
 木蘭代父去秣馬備戎行易却純綺裳洗却鉛粉妝
 馳馬赴軍幕慷慨攜干將朝屯雪山下暮宿青海傍
 夜襲月支虜更攜于闐羌將軍得勝歸士卒還故鄉
 父母見木蘭喜極成悲傷木蘭能承父母顏却卸巾
 鞬理綵箒昔為烈士雄今復嬌子容親戚持酒賀父
 母始知生女與男同門前舊軍都十年共崎嶇本結

兄弟交死戰誓不渝今也見木蘭言聲雖是顏貌殊
 驚愕不敢前歎重徒嘻吁世有臣子心能如木蘭節
 忠孝兩不渝千古之名焉可滅

從軍行二首

唐虞世南

初

塗山烽候驚弭節度龍城冀馬樓蘭將燕犀上谷兵
 劔寒花不落弓曉月逾明凜凜嚴霜節冰壯黃河絕
 蔽日卷征蓬浮天散飛雪全兵值月滿精騎乘膠折
 結髮早驅馳辛苦事旌麾馬困重關冷輪摧九折危
 獨有西山將年年屬數奇
 烽火發金微連營出武威孤城塞雲起絕陣虜塵飛

俠客吹龍劍惡少縵胡衣朝摩骨都壘夜解谷蠡圍
蕭關遠無極蒲海廣難依沙磴離旌斷晴川候馬歸
交河梁已畢燕山旆欲飛方知萬里相侯服有光輝

從軍行

唐駱賓王

初

平生一顧念意氣溢三軍野日分戈影天星合劍文
弓弦抱漢月馬足踐胡塵不求生入塞唯留死報君

從軍行

唐楊炯

初

烽火照西京心中自不平牙璋辭鳳闕鐵騎遶龍城
雪暗彫旗盡風多雜鼓聲寧為百夫長勝作一書生

從軍行

唐崔融

初

穹廬雜種亂金方武將神兵下玉堂天子旌旂過細
柳匈奴運數盡枯楊關頭落月橫西嶺塞下凝雲斷
北荒漠漠邊塵飛衆鳥昏昏朔氣聚羣羊依稀蜀杖
迷新竹髣髴胡牀識故桑臨海舊來聞驃騎尋河本
自有中郎坐看戰壁為平土近待軍營作破羌

從軍行

唐劉希夷

初

秋天風颯颯羣胡馬行疾嚴城晝不開伏兵暗相失
天子廟堂拜將軍凶門出紛紛晉陽道戎馬幾萬匹
軍門壓黃河兵氣衝白日平生懷仗劍慷慨即投筆
南登漢月孤北走代雲密近取韓彭計早知孫吳術

丈夫清萬國誰能掃一室

從軍行

唐劉庭琦初

朔風吹寒塞胡沙千萬里陣雲出岱山孤月生海水
次勝方求敵銜恩本輕死蕭蕭牧馬鳴中夜拔劍起

從軍行

唐王宏初

兒生三日掌上珠燕頤猿肱穠李膚十五學劍北擊
胡羌歌燕筑送城隅城隅路接伊川北河陽渡頭邛
鄆陌可憐少年把手時黃鳥雙飛梨花白秦王築城
三千里西自臨洮東遼水山邊疊疊黑雲飛海畔莓
莓青草死從來戰鬪不求勲殺身為君君不聞鳳凰

樓上吹急管落日徘徊腸先斷

從軍行

唐李昂初

漢家未得燕支山征戍年年沙朔間塞下長驅汗血
馬雲中恒閉玉門關陰山浩海千萬里此日桑河凍
流水稽落山邊雲騎來漁陽戍裏烽煙起長途羽檄
何相望天子按劍思北方羽林練士拭金甲將軍校
戰出玉堂幽陵異域風煙改亭障連連古今在夜聞
鴻鴈南渡河曉望旌旗北極海塞沙飛浙瀝遙裔連
窮磧玄漠雲平初合陣西山月出聞鳴鏑城南百戰
多苦辛路傍死卧黃沙人戎衣不脫隨霜雪汗馬蹶

蹉長被鐵楊葉樓中不寄書蓮花劍上空流血匈奴
 未滅不言家驅逐行行邊徼賒歸心海外見明月別
 思天邊夢落花落花迴望何悠悠芳樹無人渡隴頭
 春雲不變陽關雪桑葉先知胡地秋田疇不賣盧龍
 策竇憲思勒燕然石縻兵靜北垂此日交河湄欲令
 塞上無干戚會待單于繫頸時

從軍行

唐賀朝盛

朔胡乘月寇邊城軍書插羽刺中京天子金壇拜飛
 將單于玉塞振佳兵騎射先鳴推任俠龍韜決勝佇
 時英聞有河湟客惜情理帷帟常山啓霸圖汜水先

天策銜珠浴鐵向桑乾釁旗膏鼓指烏丸鳴雞已報
 關山曉來鴈遙傳沙塞寒直爲寸心從苦節隴頭流
 水鳴嗚咽邊樹蕭蕭不覺春天山漠漠長飛雪魚麗
 陣接塞雲平鴈翼營通海月明始看晉幙飛鵝入旋
 聞齊壘啼鳥聲自從一戍燕支山春光幾度晉陽關
 金河未轉青絲騎玉筋應啼紅粉顏鴻歸燕相續池
 邊芳草綠已見氛清細柳營莫更春歌落梅曲烽沈
 竈減靜邊亭海晏山空肅已寧行望鳳京旋凱捷重
 來麟閣畫丹青

從軍行

唐王昌齡盛

向夕臨大荒朔風軫歸慮平沙萬餘里飛鳥宿何處
 虜騎獵長原翩翩傍河去邊聲搖白草海氣主黃霧
 百戰苦風塵十年履霜露雖投定遠筆未坐將軍樹
 早知行路難悔不理章句

從軍行六首

唐王昌齡盛

琵琶起舞換新聲總是關山離別情
 撩亂邊愁聽不盡高高秋月照長城

關城榆葉早踈黃日暮雲沙古戰場
 表請回軍掩塵骨莫教兵士哭龍荒

青海長雲暗雪山孤城遙望玉門關
 黃沙百戰穿金

甲不破樓蘭終不還

大漠風塵日色昏紅旗半捲出轅門
 前軍夜戰洮河

北已報生擒吐谷渾

胡瓶落膊紫薄汗碎葉城西秋月圓
 明勅星馳封寶

劍辭君一夜取樓蘭

玉門山嶂幾千重山北山南總是烽
 人依遠戍須看火馬踏深山不見蹤

從軍行

唐王維盛

吹角動行人喧喧行人起笳悲馬嘶亂
 爭渡金河水日暮沙漠陲戰聲煙塵裏
 盡係名王頸歸來獻天子

從軍辭

唐王維盛

髦頭夜落捷書飛來奏金門看賜衣白馬將軍頻破敵黃龍戍卒幾時歸

從軍辭二首

唐王維盛

簇甲從軍令風雲識陣難今朝拜韓信計日斬成安

二

燕頷多奇相狼頭敢犯邊寄言班定遠正是立功年

古從軍行

唐李頎盛

白日登山望烽火黃昏飲馬傍交河行人刁斗風沙暗公主琵琶幽怨多野雲萬里無城郭雨雪紛紛連

大漠胡鴈哀鳴夜夜飛胡兒眼淚雙雙落聞道玉門猶被遮應將性命逐輕車年年戰骨埋荒外空見蒲桃入漢家

從軍行

唐崔國輔盛

塞北胡霜下營州索兵救夜裏偷道行將軍馬亦瘦刀光照塞月陣色明如晝傳聞賊滿山已共前鋒鬪

從軍行

唐李白盛

從軍玉門道逐虜金微山笛奏梅花曲刀開明月環鼓聲鳴海上兵氣擁雲間願斬單于首長驅靜鐵關

從軍行

唐李白盛

正音 卷五十一
百戰沙場碎鐵衣城南已合數重圍突營射殺呼延
將獨領殘兵千騎歸

從軍五首

唐劉長卿中

迴首虜騎合城下漢兵稀白刃兩相向黃雲愁不飛
手中無尺鐵徒欲穿重圍
日極鴈門道青青邊草春一身事征戰匹馬同辛勤
末路成白首功歸天下人

黃沙一萬里白首無人憐報國劔已折歸鄉身幸全
單于古臺下邊色寒蒼然

落日更蕭條北風動枯草將軍追虜騎夜失陰山道

戰敗仍樹勳韓彭但空老

秋草秋塞上望見漁陽郭胡馬嘶一聲漢兵淚雙落
誰爲吮瘡者此事今人薄

從軍行

唐戎昱中

昔從李都尉雙鞬照馬蹄擒生黑山北殺敵黃雲西
太白沈虜地邊草復萋萋歸來邯鄲市百尺青樓梯
感激然諾重平生膽力齊芳筵暮歌發豔粉輕鬟低
半酣秋風起鐵騎門前嘶遠戎報烽火孤城嚴鼓鼙
揮鞭望塵去少婦莫含啼

古從軍

唐王建中

漢家

一作軍

逐單于日沒處河曲浮雲道傍起行子車

下宿槍城圍鼓角氊帳依山谷馬上懸壺漿刀頭分

頰肉

從軍行二首

唐令狐楚

中

却望水河闊前登雪嶺高征人幾多在又擬戰臨洮

二

胡風千里驚漢月五更明縱有還家夢猶聞出塞聲

從軍行

唐盧綸

中

二十在邊城軍中得勇名卷旗收敗馬占磧擁殘兵

覆陣烏鳶起燒山草木明塞閑思遠獵師老厭分營

雪嶺無人跡冰河有鴈聲李陵甘此沒惆悵漢公卿

從軍行

唐李約

中

看圖閑教陣畫地靜論邊烏壘天西戍鷹姿塞上川

路長唯算月書遠每題年無復生還望翻思未別前

從軍行

唐僧皎然

中

黃紙君王詔青泥校尉書誓師張虎落選將擐犀渠

霧暗津蒲失天寒塞柳踈橫行十萬騎欲掃虜塵餘

來從竇車騎行

唐李益

中

束髮逢世屯懷恩抱明義讀書良有感學劍慙非智

遂別魯諸生來從竇車騎追兵赴邊急絡馬黃金轡

出入燕南陲由來重意氣自經臯蘭戰又破樓煩地
西北護三邊東南留一尉時過歛如雲參差自不意
將軍失恩澤萬事從此異置酒高堂上薄暮秋風至
長戟與我歸騎來同棄置自酌還自飲非名又非利
歌出易水寒琴下雍門淚出逢平樂舊言在天階侍
問我從軍苦自陳少年貴丈夫交四海徒論身自致
漢將不封侯蘇卿勞遠使貴人難識心何由知忌諱

從軍樂

原作武夫詞

唐劉禹錫

中

有武夫過說余以從軍之樂翌日質於通武之善
經者則曰果有樂也夫威資而賞勞則樂用威雌

而賞競則樂橫顧其樂安出耳予惕然作是詞

武夫何泚泚衣紫襲絳裳借問胡為爾列校在鷹揚
依倚將軍勢交結少年場探丸害公吏袖刃宿名倡
家產既不事顧眄自生光酣歌高樓上袒裼大道傍
昔為編戶不足數血汚城西一坏土南風無火楚澤
閑夜行不鎖穆陵關策勲禮畢天下泰猛士按劍看

常山

時常山不定

送劉校書從軍

唐楊炯

初

天將下三宮星門召五戎坐謀資廟略飛檄佇文雄
赤土流星劍烏號明月弓秋陰生蜀道殺氣繞湟中

風雨何年別琴樽此日同離亭不可望溝水自西東
送魏大從軍 唐陳子昂初

匈奴猶未滅魏絳復從戎悵別三河道言追六郡雄
鴈山橫代北狐塞接雲中勿使燕然上獨有漢臣功

送駱奉禮從軍

唐李嶠初

玉塞邊烽舉金壇廟略申羽書資銳筆戎幕引英賓
劔動三軍氣衣飄萬里塵琴樽留別賞風景惜離晨
笛梅含晚吹營柳帶餘春希君勒石返歌舞入城闈

送人之軍中

唐賀知章盛

常經絕脉塞復見斷腸流送子成今別令人起昔愁

隴雲晴半雨邊草夏先秋萬里長城寄無貽漢國憂

送蘇六從軍

一作送吳宣從事

唐孟浩然盛

才有幕中畫而無塞上勲漢兵將滅虜王粲始從軍
旌旆邊庭去山川地脉分平生一七首感激贈夫君

送人從軍

唐杜甫盛

弱水應無地陽關已盡天今君渡沙磧累日斷人煙
好武寧論命封侯不計年馬寒防失道雪沒錦鞍韉

送族弟綰從軍安西

唐李白盛

漢家兵馬乘北風鼓行而西破犬戎爾隨漢將出門
去翦虜若草收竒功君王按劔望邊邑旄頭已落胡

正音 卷五十一
天空匈奴繫頸類應盡明年應入蒲桃宮

送外甥鄭灌從軍

唐李白盛

六博爭雄好彩來金盤一擲萬人開丈夫賭命報天子當斬胡頭衣錦回

丈八蛇矛出隴西彎弧拂箭白猿啼破胡必用龍韜策積甲應將熊耳齊

月蝕西方破敵時及瓜歸日未應遲斬胡血變黃河水梟首當懸白鵠旗

送張秀才從軍

唐李白盛

六駿食猛虎恥從駑馬羣一朝長鳴去矯若龍行雲

壯士懷遠略志存解世紛周粟猶不顧齊珪安肯分抱劔辭高堂將投霍冠軍長策掃河洛寧親歸汝墳當令千古後麟閣著奇勲

送崔校書從軍

唐錢起中

鴈門太守能愛賢麟閣書生亦投筆寧唯玉劔報知已更有龍韜佐師律別馬連嘶出御溝家人幾夜望刀頭燕南春草傷心色薊北黃雲滿眼愁聞道輕生能擊虜何嗟少壯不封侯

送韓愈從軍

唐孟郊中

志士感恩起變衣非變姓親賓改舊觀僮僕生新敬

淒淒天地秋凜凜軍馬令驛塵時一飛物色極四靜
王師既不戰廟略在無競王粲有所依元瑜初應命
一章喻檄明百萬心氣定

送侯判官赴廣州從軍

唐張籍中

年少才高求自展將身萬里赴軍門辟書遠到開呈
客公服新成著謝恩驛舫過江分白候戍亭當嶺見
紅旛海花蠻草連冬有行處無家不滿園

○赴軍

監軍附

餞趙尚書攝御史赴朔方軍

唐蘇頲初

勁虜欲南飛揚兵護朔垂趙堯寧易印鄧禹即分麾

野餞迴三傑軍謀出六奇雲邊愁出塞日下愴臨岐
拔劍行人舞揮戈戰馬馳明年麟閣上充國拜於斯

送王尚一嚴疑二侍御赴司馬都督軍

唐張說初

漢掖通沙塞邊兵護草腓將行司馬令助以鐵冠威
白露鷹初下黃塵騎欲飛明年春酒熟畱酌二星歸

送游員外赴淮西

唐獨孤及盛

多君有奇略投筆佐元戎已佩郎官印兼乘御史驄
使星隨驛騎歸路有秋風莫遣無書札他年懷袖空

武威送劉判官赴磧西行軍

唐岑參盛

火山五月人行少看君馬上疾如鳥都護行營太白
西角聲一動胡天曉

送李副使赴磧西官軍

唐岑參盛

火山六月應更熱赤亭道口行人絕知君慣度祁連
城豈能愁見輪臺月脫鞍暫入酒家壚送君萬里西
擊胡功名祗向馬上取真是英雄一丈夫

赴軍

原作古風

唐李白盛

羽檄如流星虎符合專城喧呼救邊急羣鳥皆夜鳴
白日曜紫微三公運權衡天地皆得一澹然四海清
借問此何為荅言楚徵兵渡瀘及五月將赴雲南征

怯卒非戰士炎方難遠行長號別嚴親日月慘光晶
泣盡繼以血心摧兩無聲困獸當猛虎窮魚餌奔鯨
千去不一回投軀豈全生如何舞干戚一使有苗平

贈別于羣投筆赴安西

唐劉長卿中

風流一才子經史仍滿腹心鏡萬象生文鋒眾人服
頃遊靈臺下頻棄荆山玉蹭蹬空數年徘徊冀微祿
竭來投筆硯長揖謝親族且欲圖變通安能守拘束
本持鄉曲譽肯料泥塗辱誰謂命迤邐還令計反覆
西戎今未弭胡騎屯山谷坐恃龍豹韜全輕蜂蠆毒
拂衣從此去擁傳一何速元帥許提攜他人佇瞻矚

出門寡儔侶矧乃無僮僕黠虜時相逢黃沙暮口宿
 蕭條遠迴首萬里如在目漢境天西窮胡山海邊緣
 想聞羌笛處淚盡關山曲地濶鳥飛遲風寒馬毛縮
 邊愁如浩蕩離思空斷續塞上歸限賒樽前別期促
 知君志不小一舉凌鴻鵠且願樂從軍功名振殊俗

送裴使君赴荆南行軍司馬 唐劉長卿中

盛府南門寄前程積水中月明臨夏口山晚望巴東
 故節辭江郡寒笳發渚宮漢川風景好遙羨逐羊公

送孔巢父赴河南軍 按此詩皇甫冉所作 唐劉長卿中

江南相送隔煙波况復新秋一鴈過聞道全軍征北

虜又言詩將會南河邊心冉冉鄉人絕寒色青青戰
 馬多共許陳琳工奏記知君名行未蹉跎

送裴四判官赴河西軍試

唐劉長卿中

吏道豈易愜如君誰與儔逢時將騁驥臨事無全牛
 鮑叔幸相知田蘇頗同遊英資挺孤秀清論含古流
 出塞佐持簡辭家擁鳴騶憲臺貴公舉幕府資良籌
 武士佇明試皇華難久留陽關望天盡洮水令人愁
 萬里看一鳥曠然煙霞收晚花對古戍春雪含邊州
 道路難暫隔音塵那可求他時相望處明月西南樓
 奉餞郎中四兄罷餘杭太守承恩加侍御史充

行軍司馬赴汝南行營

唐劉長卿中

星使三江上天波萬里通權分金節重恩借鐵冠雄
梅吹前軍發棠陰舊府空殘春錦帳外初日羽旗東
岸柳遮浮鷁江花隔避驄離心在何處芳草滿吳宮

送南特進赴歸行營

唐劉長卿中

聞道軍書至揚鞭不問家虜雲連白草漢月到黃沙
汗馬河源飲燒羌隴坻遮翩翩新結束去逐李輕車

送傅管記赴蜀軍

唐錢起中

終童之死誰繼出燕頷儒生今俊逸主將早知鸚鵡
賦飛書許載蛟龍筆峨眉玉壘指霞標鳥沒天低幕

府遙巴山雨色藏征旆漢水猿聲咽短簫賜壁腰金
應可料才略縱橫年且妙無人不重樂毅賢何敵能
當魯連嘯日暮黃雲千里昏壯心輕別不銷菟勸君
用却龍泉劍莫負平生國士恩

送鮑中丞赴太原軍營

唐錢起中

年壯才仍美時來道易行寵兼三獨任威肅貳師營
將略過南仲天心寄北京雲旂臨塞色龍笛出關聲
漢月隨霜去邊塵計日清漸知王事好文武用書生

送王使君赴太原行營

唐錢起中

太白明無象皇威未戢戈諸侯持節鉞千里控山河

漢驛雙旌度胡沙七騎過驚烽連鴈起牧馬入雲多
不賣盧龍塞能消滄海波須傳出師頌一作表莫奏式
微歌

送常大夫加散騎常侍赴

方朔

唐皇甫冉中

故壘煙霞後新軍河塞間金貂寵漢將玉節度蕭關
澶漫沙中雪依稀漢口山人知寶車騎計日勒銘還

送王相公赴幽州

唐皇甫曾中

台袞兼戎律勤憂秉化元鳳池東掖寵龍節北方尊
長路山河轉前驅鼓角喧人安布時令地遠答君恩
暮日平沙漠秋風大旆翻漁陽在天末戀別信陵門

送徐大夫赴南海

唐皇甫曾中

舊國當分闔天涯答聖私大軍傳羽檄老將拜旌旗
位重登壇後恩深弄印時何年諫獵賦今日飲泉詩
海內求民瘼城隅見島夷由來黃霸去自有上台期

送韋行軍員外赴河陽

唐權德輿中

五年武弁侍明光輟佐中權拜外郎記事還同楚倚
相傳經遠自漢扶陽離堂處處羅簪組東望河橋壯
鼙鼓三城曉角啓轅門一縣繁花照蓮府上略儒風
竝者稀翩翩騶騎有光輝只今左職多虛位應待他
時仗節歸

送孫潑赴雲中

唐韓翃中

黃驄少年舞雙戟自視旁人皆辟易百戰能誇隴上
兒一身復作雲中客寒風動地氣蒼茫橫吹先悲出
塞長敲石軍中傳夜火斧冰河畔汲朝漿前鋒直指
陰山外虜騎紛紛膽應碎匈奴破盡口看歸金印酬
功如斗大

送王誕渤海使赴李太守

行營 唐韓翃中

少年結客散黃金中歲連兵掃綠林渤海名王曾折
首漢家諸將盡傾心行人去指徐州近飲馬迴看泗
水深喜見明時鍾太尉功名一似舊淮陰

送劉侍御赴令公行營

唐韓翃中

東城躍紫驪西路大刀頭上客劉公幹元戎郭細侯
一軍偏許國百戰又防秋請問蕭關道胡塵早晚收

送李侍御赴徐州行營

唐韓翃中

少年兼柱史東至舊徐州遠屬平津閣前驅博望侯
向營淮月滿吹角楚天秋客夢依依處寒山對白樓

送鄭正則赴徐州行營

唐郎士元中

從軍非隴頭師在古徐州氣勁三河卒功全萬戶侯
元戎闔外略才子握中等莫聽關山曲還生塞上愁

送李傅侍郎赴劔南行營

唐賈島中

走馬從邊事新恩受外臺勇看雙節出期破八蠻回
許國家無戀盤江棧不推移軍刁斗逐報捷劔門開
角咽獼猴叫鼙乾霹靂來去年新甸邑猶滯佐時才

送邊將

唐李咸用

晚一作李咸

天驕頻犯塞鐵騎又征西臣節輕鄉土雄心生鼓鼙
地寒花不豔沙遠日難低漸喜秋弓健鷗翻白草齊

送友罷舉赴邊職

唐李洞

晚

出剡篇章入洛文無人細讀歎俱焚莫辭秉笏隨紅
旆便好攜家住白雲過水象浮蠻境見隔關一作江猿
叫漢州聞高談濶略陳從事盟誓邊庭壯我軍

送監軍李判官

唐韓翃

中

上客佩雙劔東城喜再遊舊從張博望新事鄭長秋
踏水回金勒看風試錦裘知君不久住漢將掃旄頭

送軍

從駕送軍

陳沈炯

惟堯稱乃武軒后號神兵弔民資智勇治亂屬師貞
我君膺寶業歷駕視前英蒲海方無浪夷山未有平
星光下結旆劔氣上舒精雲開萬里徹日麗百川明
撫鼓山靈應詔蹕水祇驚

和趙王送峽中軍

北周庾信

樓船聊習戰白羽試搗軍山城對却月岸陣抵平雲
赤地懸弩影流星抱劍文胡笳遙警夜塞馬暗嘶羣
客行明月峽猿聲不可聞

送兵到薊北

唐高適盛

積雪與天迴屯軍連塞愁誰知此行邁不為覓封侯

獨孤判官部送兵

唐高適盛

餞君嗟遠別為客念周旋征路今如此前軍猶眇然
出關逢漢壁登隴望胡天亦是封侯地期君早著鞭

送白少府送兵之隴右

唐高適盛

殘更登隴首遠別指臨洮為問關中事何如州縣勞

軍容隨赤羽樹色引青袍誰斷單于臂今年太白高

送部四鎮人往單于別知故

唐徐九臯盛

天下今無事雲中獨未寧忝驅更戍卒方遠送邊庭
馬飲長城水軍占太白星國恩行可報何必守經營

送防秋人

唐周賀中

匹馬無窮地三年逐大軍算程淮邑遠起帳夕陽曛
口浪行時漱邊笳語次聞要傳書札去應到磧東雲

詩雋類函卷五十六

詩雋類函卷五十七

東吳俞安期彙纂

宣城梅鼎祚增定

金明蕭如薰訂校

武部三

戊 幕府 軍中 出圍 武功

乞師 一石募附

○戊

北戍瑯琊城

齊江孝嗣

驅馬一連翩日下情不息芳樹似佳人惆悵余何極
薄暮苦羈愁終朝傷旅食丈夫許人世安得顧心臆
按劔勿復言誰能耕與織

和江丞北戍瑯琊城

齊謝朓

春城麗白日阿閣跨層樓蒼江忽渺渺驅馬復悠悠
京洛多塵霧淮濟未安流豈不思撫劍惜哉無輕舟
夫君良自勉歲暮勿淹留

遠戍江南

一作城寄京邑親友

隋書本傳曰萬壽為滕穆王文學坐

衣冠不整配防江南宇文述召典軍書薛薛

不得志為五言詩寄京邑知友盛為當時之

所吟
隋孫萬壽

賈誼長沙國屈平

一作平原湘水濱江南瘴癘地從來多

逐臣粵余非巧宦少小拙謀身欲飛無假翼思鳴不

值晨如何

一作誰言載筆士翻作負戈人飄颻如木偶棄

置同芻狗失路乃西浮非狂亦東走晚歲出函關方

春度京口石城臨虎據天津望牛斗牛斗盛妖氛梟

獍已成羣郗超初入幕王粲始從軍裏糧楚山際披

甲吳江濱吳江一浩蕩楚山何糾紛驚波上濺日喬

木下臨雲繫越恒資辯喻蜀幾飛文魯連唯救患吾

彥不爭勲

英華作唐彬不競勲詩云晉書唐彬知孫

爭勲按吾彥乃降將

皓將至遲留以示不競今隋書作吾彥不

不樹萱豈為無杯酒數載辭鄉縣三秋別親友壯志

後風雲衰鬢先蒲柳心緒亂如絲空懷疇昔時昔時

遊帝里弱歲逢知己旅食南館中飛蓋西園裏河間

本好書東平唯愛士英辯接天人清言洞名理

一作歡娛

子承帝 鳳池時寓直麟閣常遊止勝地盛賓僚麗景相
 攜招舟汎昆明水騎指渭津橋袂除臨灞听供帳出
 東郊宜城醞始熟陽翟曲新調繞樹烏啼夜唯麥雉
 飛朝細塵梁下落長袖掌中嬌歡娛三樂至一作流連三雅
 至懷抱百憂銷夢想猶如昨尋思久寂寥一朝牽世
 網萬里逐波潮迴輪常自轉懸旆不堪搖登高視作
 想山川 衿帶鄉關白雲外迴首望孤城愁人益不平華
 亭宵鶴唳幽一作谷早鶯鳴斷絕心難續恹恍竟屢
 驚羣紀通家好一作契鄒魯故鄉情若一作倘值南飛鴈
 時能一作希訪死生

夕戍邊城有懷京邑

唐駱賓王 初

擾擾風塵地遑遑名利圖盈虛一易舛心迹兩難俱
 弱齡小山志寧期大丈夫九微光噴玉千仞忽彈珠
 棘寺遊三禮蓬山造八儒懷鉛慙後進投筆願前驅
 北走非通趙西之似化胡錦車朝促候刁斗夜傳呼
 戰士青絲絡將軍黃石符連星入寶劔半月上雕弧
 拜井開疏勒鳴桴動密須戎機習短蔗妖祲淨長榆
 季月炎初盡邊庭草早枯層陰籠古木窮色變寒蕪
 海鶴聲嘹唳城烏尾畢逋葭繁秋色引桂滿夕輪虛
 行役風霜久鄉園夢想孤灞池遙夏國秦海望陽紆

沙塞三千里京城十二衢楊溝連鳳闕槐路擬鴻都
璧殿規宸象金隄法斗樞雲浮西北界月照東南隅
寶帳垂連理銀牀轉輓轡廣筵留上客豐饌引中厨
漏緩金徒箭嬌繁玉女壺秋濤飛喻馬春水泛仙鱸
意氣風雲合言忘道術趨共矜名已泰詎肯沫相濡
有志慙凋朽無庸類散樗關山暫超忽形影歎艱虞
結網空知羨圖榮豈自誣忘情同塞馬比德類轅駒
隴坂肝腸絕陽關亭障迂迷竟驚落鴈離恨斷飛鳧
春去容華盡年來歲月無邊愁傷郢調鄉思繞吳歛
河氣通中國山途限外區相思若可寄冰泮有銜蘆

戍龍庭原作古風

唐李白盛

岱馬不思越越禽不戀燕情性有所習土風固其然
昔別鴈門關今戍龍庭前驚沙亂海日飛雪迷胡天
蟣蝨生虎鶻心竟逐旌旃苦戰功不賞忠誠難可宣
誰憐李飛將白首沒三邊

贈戍兵

唐韋莊晚

漢皇無事暫遊汾底處狐狸嘯作羣夜指碧天占晉
分曉磨孤劔望秦雲紅旌不卷風長急盡角閑吹日
又曛止竟有征須有戰洛陽何用久屯軍

○幕府

信安王幕府詩 并序

唐高適 盛

開元二十年國家有事林胡詔禮部尚書信安王
 總戎大舉時考功郎中王公司勳郎中劉公主客
 郎中魏公侍御史李公監察御史崔公咸在幕府
 詩以頌美數公見于詞

雲紀軒皇代星高太白年廟堂洛上策幕府制中權
 盤石藩維固昇壇禮樂先國章榮印綬公服貴貂蟬
 樂善旌深德輸忠格上玄翦桐光寵錫題劍美貞堅
 聖祚雄圖廣師貞武德虔雷霆七校發旌旆五營連
 華省徵群又霜臺舉二賢豈伊公望遠曾是茂才遷

並秉韜鈴術兼該翰墨筵帝思麟閣像臣獻柏梁篇
 振玉登遼甸從金歷薊墟度河飛羽檄橫海汎樓船
 北伐聲逾邁東征務以專講戎喧涿野料敵靜居延
 軍勢持三畧兵戎自九天朝瞻授鉞去時聽偃戈旋
 大漠風沙裏長城雨雪邊雲端臨碣石波際隱朝鮮
 夜壁衝高斗寒空駐彩旃倚弓玄兔月飲馬白狼川
 庶物隨交泰蒼生解倒懸四郊增氣象萬里絕風煙
 關塞鴻勳著京華甲第全落梅橫吹後春色凱歌前
 直道常兼濟微才獨棄捐曳裾誠已矣投筆尚悽然
 作賦同元淑能詩匪仲宣雲霄不可望空欲仰神仙

中丞宋公以吳兵三千赴河南軍次尋陽脫余
之囚參謀幕府因贈之
唐李白盛

獨坐清天下專征出海隅九江皆渡虎三郡盡還珠
組練明秋浦樓船入郢都風高初選將月滿欲平胡
殺氣橫千里軍聲動九區白猿慙劍術黃石借兵符
戎虜行當翦鯨鯢立可誅自憐非劇孟何以佐良圖

在水軍宴贈幕府諸侍御

唐李白盛

月化五白龍翻飛凌九天胡沙驚北海電掃洛陽川
虜箭雨宮闕皇輿成播遷英王受廟畧秉鉞清南邊
雲旗捲海雪金戟羅江煙聚散百萬人弛張在一賢

霜臺降羣彥水國奉戎旃繡服開宴語天人借樓船
如登黃金臺遙謁紫霞仙卷身編蓬下冥機四十年
寧知草間人腰下有龍泉浮雲在一決誓欲清幽燕
願與四座公靜談金匱篇齊心戴朝恩不惜微軀捐
所冀旄頭滅功成追魯連

奉贈盧五丈參謀琚

唐杜甫盛

恭惟同自出妙選異高標入幕知孫楚披襟得鄭僑
丈人藉才地門閥冠雲霄老矣逢迎拙相於契托饒
賜錢傾府待爭米駐船遙鄰好艱難薄氓心杼軸焦
客星空伴使寒水不成潮素髮乾垂領銀章破在腰

說詩能累夜醉酒或連朝藻翰惟牽率湖山合動搖
時清非造次興盡却蕭條天子多恩澤蒼生轉寂寥
休傳鹿是馬莫信鵬爲鴉未解依依袂還斟汎汎瓢
流年疲蟋蟀體物幸鷦鷯幸負滄洲願誰云晚見招

送史司馬赴崔相公幕

唐岑參

盛

崢嶸丞相府清切鳳凰池羨爾瑤臺鶴高栖瓊樹枝
歸飛晴日好吟弄惠風吹正有乘軒樂初當學舞時
珍禽在羅網微命若游絲願托周南羽相銜漢水湄

送趙判官赴黔府中丞叔幕

唐李白

盛

廓落青雲心結交黃金盡富貴翻相忘令人忽自哂

蹭蹬鬢毛斑盛時難再還巨源咄石生何事馬蹄間
綠蘿長不厭却欲還東山君爲魯曾子拜揖高堂裏
叔繼趙平原偏承明主恩風霜推獨坐旌節鎮雄藩
虎士秉金鉞蛾眉開玉樽才高幕下去義重林中言
水宿五谿月霜啼三峽猿東風吹草綠江上候歸軒

送張遙之壽陽幕府

唐李白

盛

壽陽信天險天險橫荆關苻堅百萬衆遙阻八公山
不假築長城大賢在其間戰夫若能虎破敵有餘閑
張子勇且英少輕衛霍孱投軀紫髯將千里望風顏
最爾効才畧功成衣錦還

送程劉二侍御兼獨孤判官赴安西幕府

唐李白盛

安西幕府多才雄喧喧惟道三數公繡衣貂裘明積
雪飛書走檄如飄風朝辭明主出紫宮銀鞍送別金
城空天外飛霜下葱海火旗雲馬生光彩胡塞塵清
幾日歸漢家草綠遙相待

送李八祕書赴杜相公幕

唐杜甫盛

青簾白舫益州來巫峽秋濤天地迴石出倒聽楓葉
下櫓搖背指菊花開貪趨相府今晨發恐失佳期後
命催南極一星朝北斗五雲多處是三台

贈別劉長卿時起河南嚴中丞幕府

唐嚴維中

早見登郎署同時跡下僚幾年江路永今去國門遙
文變騷人體官移漢帝朝望山吟度日接枕話通宵
萬里趨公府孤帆恨信潮匡時知己老聖代耻逃堯

送嚴維赴河南嚴中丞幕府

唐劉長卿中

久別耶溪客來乘使者軒用才榮入幕扶病喜同樽
山屐留何處江帆去獨翻暮情辭鏡水秋夢識雲門
蓮府開花萼桃園寄子孫何當舉嚴助偏沐漢朝恩

送李校書赴東浙幕府

唐劉長卿中

方從大夫後南去會稽行淼淼滄江外青青春草生
芸香辭口事梅吹聽軍聲應訪王家宅空憐江水平

送王季友赴洪州幕下

唐錢起

中

列郡皆用武南征所從誰諸侯重才畧見子如瓊枝
撫劍感知已出門方遠辭煙波帶幕府海日生紅旗
問我何功德負恩留玉墀銷魂把別袂愧爾酬明時

送宋校書赴宣州幕

唐盧綸

中

南想宣城郡清江野戍閒艤艫高映浦睥睨曲隨山
名寄圖書內威生將吏間春行板橋暮應伴庾公還

送李縱別駕加員外郎却赴常州幕

唐盧綸

中

霄漢正聯飛江湖又獨歸暫歡同賜被不待易朝衣
山雨迎軍晚蘆風候火微還當宴鈴閣謝守亦光輝

送從叔程歸西川幕

唐盧綸

中

千山冰雪晴山靜錦花明群鶴栖蓮府諸戎拜柳營
浪依巴字息風入蜀關清豈念在貧巷竹林鳴鳥聲

送暢當赴山南幕

唐盧綸

中

含情脫佩刀持以佐賢豪是月霜霰下伊人行役勞
事將名共易文與行空高去矣奉戎律悲君爲我曹
送李二十九兄員外赴邠寧使幕

家襲韋平生業文素風清白至今聞南宮通籍新郎
吏西族從戎舊主人城外草黃秋有雪烽頭煙靜虜
無塵鼎門為別霜天曉賸把離觴三五巡

唐劉禹錫中

送趙中丞自司金員外郎轉官參山南令狐僕

射幕府 趙氏弟兄皆僕射門客

唐劉禹錫中

綠樹滿袞斜西南蜀路賒驛門臨白草縣道入黃花
相府開油幕門生逐絳紗行看布政後還從入京華

送韋侍御赴湖南幕府

唐李嘉祐中

執憲隨征虜逢秋出故關雨多愁郢路葉下識衡山

地遠從軍樂兵疆分野閒皇家不易將此去未應還

送元侍御還荆南幕府

唐李嘉祐中

迢遞荊州路山多水又分霜林淡寒日朔鴈蔽南雲
八座由持節三湘亦置軍自當行直指應不為功勳

送劉評事赴廣州使幕

唐韓翃中

征南官屬似君稀才子當今劉孝威蠻府參軍趨傳
舍交州刺史拜行衣前臨瘴海無人過却望衡陽少
鴈飛為報蒼梧雲影道明年早送客帆歸

送趙評事赴洪州使幕

唐韓翃中

孤舟行遠近一路過湘東官屬張廷尉身隨杜幼公

山河映湘竹水驛帶青楓萬里思君處秋江夜雨中
送張郎中副使自南省赴鳳翔府幕

唐羊士諤中

仙郎佐氏謀廷議寵元侯城郭須來貢河湟亦順流
亞夫高壘靜充國大田秋當奮燕然筆銘功向隴頭

送陸郎中歸田司空幕

唐李端中

漢家分列宿東土佐諸侯結束還軍府光輝過御溝
農桑連紫陌分野入青州覆被恩難報西看成白頭

送王副使君還并州幕

唐李端中

并州近胡地此去事風沙鐵馬垂金絡貂裘犯雪花

曾持兩郡印多比五侯家繼世新恩厚從軍舊國賒
戍煙千里直過鴈一行斜想到青油幕長謀出左車

送李侍御益赴幽州幕

唐韋應物中

二十揮篇翰三十窮典墳辟書五府至名為四海聞
始從車騎幕今赴嫖姚軍契闊晚相遇草感遽離羣
悠悠行子遠眇眇川塗分登高望燕代日夕生夏雲
司徒擁精甲誓將除國氛儒生幸持斧可以佐功勳
無言羽書急坐闕相思文

送石處士赴河陽幕

唐韓愈中

長把種樹書人云避世士忽騎將軍馬自號報恩子

風雲入壯懷泉石別幽墅鉅鹿師欲老常山險猶恃
豈惟彼相憂固是吾徒耻去去事方急酒行可以起

送韋校書佐靈州幕

唐朱慶餘

中

共知行處樂猶惜此時分職已為書記官曾校典墳
塞城初落葉高戍遠生雲邊事何須問深謀祗在君

送崔校書赴梓幕

唐司空曙

中

碧峰天柱下鼓角鎮南軍管記催飛檄蓬萊輟校文
棧霜朝似雪江霧晚成雲想出褒中望巴庸方路分

送盧汀侍御歸天德幕

唐孟郊

中

仲宣領騎射結束皆少年匹馬黃河岸射鵬清霜天

旌旗防日北道路上雲巔古雪無銷鑠新冰有堆填
清溪徒聳誚白壁自招賢豈比重思者閉門方獨全

送馮八將軍奏事畢歸滑臺幕府

唐崔峒

中

王門別後到滄州帝里相逢俱白頭自歎馬卿常帶
疾還嗟李廣不封侯棠梨宮裏瞻龍袞細柳營中看
虎裘想到滑臺桑葉落黃河東注杏園秋

送復夢赴韋令幕

唐元稹

中

世上如今重檢身吾徒耽酒作狂人西曹舊事多持
法慎莫吐佗丞相茵

送李司直歸浙東幕兼寄鮑將軍

唐朱長文

翩翩書記早曾聞二十年來願見君今日朝廷想白
髮同時幾許在青雲人從北固山邊去水到西陵渡
口分會作王門曳裾客爲余前謝鮑將軍

送杜顥赴潤州幕

唐杜牧

晚

少年才俊赴知音丞相門欄不覺深直道事人男子
業異鄉加飯弟兄心還須整理韋弦佩莫獨矜誇玳
瑁簪若去上元懷古去謝安墓下與沈吟

送從翁從東川弘農尚書幕

唐李商隱

晚

昔帝迴冲眷維皇惻上仁三靈迷赤氣萬彙叫蒼旻
刊木方隆禹陞阨始創殷夏臺曾圯閉汜水敢逡巡
拯溺休規步防虞要徙薪烝黎今得請宇宙昨還淳
纘祖功宜急貽孫計甚勤降災雖有代稔惡不無因
宮掖方爲蠱邊隅忽邁迤獻書秦逐客間謀漢名臣
北伐將誰使南征決此辰中原重板蕩玄象失鉤陳
詰旦違清道銜枚別紫宸茲行殊厭勝故老遂分新
去異封於鞏來寧避處幽永嘉幾失墜宣政遽酸辛
元子當傳啓皇孫合授詢時非三指讓表請再陶鈞
舊好盟還在中樞策屢遵蒼皇傳國璽違遠屬車塵

雛虎如憑怒，祭龍性漫馴。封崇自何等，流落乃斯民。
逗撓官軍亂，優容敗將頻。早朝披草莽，夜譴達絲綸。
忘戰追無及，長驅氣益振。婦言終未易，廟畧况非神。
日馭難淹蜀，星旄要定秦。人心誠未去，天道亦無親。
錦水湔雲浪，黃山掃地春。斯文虛夢鳥，吾道欲悲麟。
斷續殊鄉淚，存亡滿席珍。魂銷季羔竇，衣化子張紳。
建議庸何所，通班昔濫臻。浮生見開泰，獨得詠汀蘋。
送從翁從東川弘農尚書幕 唐李商隱 晚

大鎮初更帥，嘉賓素見邀。使車無遠近，歸路更煙霄。
穩放驂騮步，高安翡翠巢。御風知有在，去國肯無聊。
早忝諸孫末，俱從小隱招。心懸紫雲閣，夢斷赤城標。
素女悲清瑟，秦娥弄碧簫。山連玄圃近，水接絳河遙。
豈意聞周鐸，翻然慕舜韶。皆辭喬木去，遠逐斷蓬飄。
薄俗誰其激，斯民已甚忪。鸞皇期一舉，燕雀不相饒。
敢共頽波遠，因之內火燒。是非過別夢，時節慘驚飈。
未至誰能賦，中乾欲病消。屢曾紆錦繡，勉欲報瓊瑤。
我恐霜侵鬢，君先綬挂腰。甘心與陳阮，揮手謝松喬。
錦里差隣接，雲臺閉寂寥。一川虛月魄，萬崦自芝苗。
瘴雨瀧間急，離魂峽外銷。非關無燭夜，其柰落花朝。
幾處逢鳴珮，何筵不翠翹。蠻僮騎象舞，江市賣鮫綃。

南詔知非敵西山亦屢驕勿貪佳麗地不為聖明朝
 少減東城飲時看北斗杓莫因乖別久遂逐歲寒凋
 盛幕開高宴將軍問故寮為言公玉季早日棄漁樵
 ○軍中

擬鮑參軍照戎行

梁江淹

豪士枉尺璧宵人重恩光狗義非為利執羈輕去鄉
 孟冬郊祀月殺氣起嚴霜戎馬粟不暖軍士米為漿
 晨上城臯坂磧礫皆羊腸寒一作雲陰籠白日犬谷晦
 蒼蒼息徒稅征駕倚劍臨八荒鷓鴣不能飛玄武伏
 川梁鍛翮由時至感物聊自傷豎儒守一經未足識

行藏

軍中行路難

唐辛常伯初

君不見封狐雄虺自成羣憑深負固結妖氛玉璽分
 兵徵惡少金壇授律動將軍將軍擁旄宣廟畧戰士
 橫戈靜夷落長驅一息背銅梁直指三危登劍閣閣
 道迢迢起戍樓劍門遙裔俯靈丘邛關九折無平路
 江水雙源有急流征役無期返他鄉歲月晚杳杳丘
 陵出蒼蒼林薄遠途危紫蓋峯路澀青泥坂去去指
 哀牢行行入不毛絕壁千里險連山四望高中外分
 區宇夷夏殊風土交趾枕南荒昆彌臨北戶川源饒

毒霧谿谷多淫雨行潦四時流崩查千歲古漂梗飛
蓬不暫安捫蘿引葛陟危巒昔時聞道從軍樂今日
方知行路難滄江綠水東流駛炎州丹徼南中地南
中南斗映星河秦關秦塞阻煙波三春邊地風光少
五月瀘中瘴癘多朝驅疲斥埃夕息倦樵歌向月彎
繁弱連星轉太阿重義輕生懷一顧東征西伐凡幾
度夜夜朝朝斑鬢新年年歲歲戎衣故灞城隅滇池
水天涯望轉積地際行無已徒覺炎涼節物非不知
關山千萬里棄置勿重陳征行多苦辛且悅清笳梅
柳曲誰憶芳園桃李人絳節紅旗分日羽丹心白刃

酬明主但令一被君王知誰憚三邊征戰苦行路難
幾千端無復歸雲憑短翰空餘望日想長安

軍中行路難

同辛常伯作

唐駱賓王

初

君不見玉關塵色暗邊庭銅鞮雜虜寇長城天子按
劍徵餘勇將軍授脈事橫行七德龍韜開玉帳千里
鼙鼓疊金鉦陰山苦霧埋高壘交河孤月照連營連
營去去無窮極擁旆遙遙過絕國陣雲朝結晦天山
寒沙夕漲迷疎勒龍鱗水上開魚貫馬首山前振鷗
翼長驅萬里警祁連分麾三命武功宣百發烏號搖
碎柳七尺龍文迴照蓮春來秋去移灰琯蘭闥柳市

芳塵斷鴈門迢遞尺書稀鴛被相思雙帶緩行路難
 誓令氛祲靜臯蘭但使封侯龍額貴詎隨中婦鳳樓
 寒

在軍中贈先還知己

唐駱賓王初

蓬轉俱行役瓜時獨未還魂迷金闕路望斷玉門關
 獻凱多慙霍論封幾謝班風塵催白首歲月損紅顏
 落鴈低秋塞驚鳥起暝灣胡霜如劍鏑漢月似刀環
 別後庭前樹相思幾度攀

夜發軍中

唐李益中

邊馬櫪上驚雄劍匣中鳴半夜軍書至匈奴寇六城

中間分暗陣太乙起神兵出沒風雲合蒼黃豺虎爭
 今日邊庭戰綠賞不緣名

疲兵篇

唐劉長卿中

驕虜乘秋下薊門陰山日夕煙塵昏三軍疲馬力已
 盡百戰殘兵功未論陣雲泱泱屯塞北羽書紛紛來
 不息孤城望處增斷腸折劍看時可霑臆元戎日夕
 且歌舞不念關山久辛苦自矜倚劍氣凌雲却笑聞
 笳淚如雨萬里飄飄空此身十年征戰老胡塵赤心
 報國無片賞白首還家有幾人朔風蕭蕭動枯草旌
 旗獵獵榆關道漢月何曾照客心胡笳只解催人老

軍前仍欲破重圍
閨裏猶應愁未歸
小婦十年啼夜
織行人九月憶
寒衣飲馬滹沱
晚更清行吹羌
笛遠歸營只恨
漢家多苦戰徒
遺金鏃滿長城

○乞師

召募附

代宋州將淮上乞師

唐耿漳

中

唇齒相依危亡故
遠歸輕身百戰出
家在數重圍上將
堅深壘殘兵鬪落
暉常聞鐵劍利早
晚借餘威旅次丹
陽郡遇康侍御宣
慰召募兼別岑單
父

唐劉長卿

中

客心募千里迴首
煙花繁楚水渡歸
夢春江連故園

羈人懷上國驕虜
窺中原胡馬暫為
害漢臣多負恩
羽書晝夜飛海內
風塵昏霜鬢日已
白孤舟心且論
繡衣從此來汗馬
宣王言憂憤激忠
勇悲歎動黎元
南徐爭赴難發卒
如雲屯倚劍看太
白洗兵臨海門
故人亦滄洲少別
堪傷竟積翠下京
口歸潮落山根
如何天外帆又此
波上樽空使憶君
處鶯聲催淚痕

○出圍

出重圍和傅昭

梁沈約

魯連揚一策陳平
出六奇邯鄲風雨
散白登煙霧維
排雲出九地陵定
振五卮

送裴判官自賊中再歸河陽幕府

唐岑參盛

東郊未解圍忠義似君稀
誤落胡塵裏能持漢節歸
卷簾山對酒上馬雪沾衣
却向嫖姚幕翩翩去若飛

喜達行在所三首

唐杜甫盛

西憶岐陽信無人遂却回
眼穿當落日心歎著寒灰
霧樹行相引蓮峯望忽開
所親驚老瘦辛苦賊中來

二

愁思胡笳夕淒涼漢苑春
生還今日事間道暫時人
司隸章初覩南陽氣已新
喜心翻倒極嗚咽淚沾巾

三

歿去憑誰報歸來始自憐
猶瞻太白雪喜遇武功天
影靜千官裏心蘇七校前
今朝漢社稷新數中興年
太常魏博士遠出賊庭江
外相逢因叙其事

唐皇甫冉中

烽火驚戎塞豺狼犯帝畿
川原無稼穡日月翳光輝
里社枌榆毀宮城騎吏非
群生被慘毒雜虜耀輕肥
毀土從芳餌唯君識禍機
心同合浦葉命寄首陽薇
耻作織鱗煦方隨高鳥飛
山經商嶺出水泛漢池歸
離別霜凝鬢逢迎淚迸衣
京華長路絕江海故人稀

秉節身常苦求仁志不違祇應窮野外耕種且相依
○武功

破陳樂詞二首

唐張說初

漢兵出頓金微照日光明鐵衣百里火幡焰焰千行
雲騎駢駢蹙踏遼河自竭鼓譟燕山可飛正屬西方
朝賀端知萬舞皇威

少年膽氣凌雲共許驍雄出群匹馬城西挑戰單刀
薊北從軍一鼓鮮卑送款五餌單于解紛誓欲成名
報國羞將開口論勲

平戍詞二首

唐王維盛

三

歿去憑誰報歸來始自憐猶瞻太白雪喜遇武功天
影靜千官裏心蘇七校前今朝漢社稷新數中興年
太常魏博士遠出賊庭江外相逢因叙其事

唐皇甫冉中

烽火驚戎塞豺狼犯帝畿川原無稼穡日月翳光輝
里社紛榆毀宮城騎吏非群生被慘毒雜虜耀輕肥
毀土從芳餌唯君識禍機心同合浦葉命寄首陽薇
耻作織鱗煦方隨高鳥飛山經商嶺出水泛漢池歸
離別霜凝鬢逢迎淚迸衣京華長路絕江海故人稀

秉節身常苦求仁志不違祇應窮野外耕種且相依
○武功

破陳樂詞二首

唐張說初

漢兵出頓金微照日光明鐵衣百里火幡焰焰千行
雲騎駢駢蹙踏遼河自竭鼓譟燕山可飛正屬西方
朝賀端知萬舞皇威

少年膽氣凌雲共許驍雄出群匹馬城西挑戰單刀
薊北從軍一鼓鮮卑送款五餌單于解紛誓欲成名
報國羞將開口論勲

乎戍詞二首

唐王維盛

太白秋高助後兵長風夜卷虜塵清男兒解却腰間
劍喜見從王道化平

捲旆生風喜氣新早持龍節靜邊塵漢家天子圖麟
閣身是當今第一人

哥舒大夫頌德

唐儲光義盛

天紀啓真命君生臣亦生乃知赤帝子復有蒼龍精
神武建皇極文昌開將星超超渭濱器落落山西名
畫闔入受服鑿門出扞城戎人昧正朔我有軒轅兵
隴路起豐鎬關雲隨旆旌河湟訓兵甲義勇方橫行
韓魏多銳士蹙張在幕庭大非四決軋石堡高崢嶸

攻伐若振槁孰云非神明嘉謀即天意驟勝由師貞
 枯草被西陸烈風昏太清戢戈旄頭落牧馬崑崙平
 賓從儼冠蓋封山紀天聲來朝芙蓉闕鳴玉飄華纓
 直道濟時憲天邦遂輕刑抗書報知己松柏亦以榮
 嘉命列上第德輝照天京在車持簡墨粲粲皆詞英
 顧我捨榆者莫能翔青冥遊燕非騏驥躑躅思長鳴
 觀范陽遞俘

唐儲光義盛

北河旄星殞鬼方彌林胡羣師舞弓矢電發歸燕墟
 皇皇軒轅君贊贊臯陶謨方思壯軍實遠近遞生俘
 車馬踐大逵合沓成深渠牧人過橐駝校正引駒駝

烈風朝送寒零雪靄天隅草木同一色誰能辨榮枯
 四履封元戎百金酬勇夫大邦武功爵固與炎皇殊
 送丘健至州勅放作時任下邳尉

唐儲光義盛

太史登觀臺天街耀旄頭大君忽霆震詔爵冠軍侯
 南必梁孫源西將圍崑丘河隴徵擊卒虎符到我州
 朝集咸林城師言亂啁啾殺氣變木德凜凜如高秋
 元戎啓神皇廟堂發嘉謨息兵業稼穡歸馬復休牛
 和風開陰雪大耀中天流歡聲殷河岳涵盪非煙浮
 邦牧新下車德禮被甿謳乾坤日交泰吾亦遂優游

贈鄭員外

唐陶翰盛

驄馬拂繡裳按兵遼水陽西來鴈門騎北逐樓煩王
聞道五軍集相邀百戰場風沙暗天起虜陳森幾行
儒服揖諸將雄謀吞八荒金門求謁見朱紱生輝光
數載侍御史稍遷尚書郎人生志氣立所貴功業昌
何必守章句終年事蒼黃同時獻賦客尚在東陵傍

寄董卿嘉榮十韻

唐杜甫盛

聞道君牙帳防秋近赤霄下臨千嶺雪却背五繩橋
海內久戎服京師今晏朝犬羊曾爛熳宮闕尚蕭條
猛將宜嘗膽龍泉必在腰黃圖遭污辱月窟可焚燒

會取干戈利無令斥埃驕居然雙捕虜自是一嫖姚
落日思輕騎秋天憶射鵰雲臺畫影像皆為掃氛妖

寄賀田侍中東平功成

唐王建中

使迴高品滿城傳纔見沂公在陣前百里旗旛衝即
斷兩重衣甲射皆穿探知點檢兵應怯筭得新移柵
未堅營被數驚乘勢破將經頻敗遂生全密招殘寇
防人覺遙斬元兇恐自專首讓諸軍無敢近功歸部
曲不爭先開通州縣斜連海交割山河直到燕戰馬
散驅還逐草肉牛齊散却耕田府中獨拜將軍貴門
下兼分宰相權唐史上頭功第一春風雙節好朝天

和渭北劉大夫借便秋遮虜寄朝中親友

唐白居易中

巨鎮為邦屏全材作國楨韜鈴漢上將文墨魯諸生
豹虎關西卒金湯渭北城寵深初授棨威重正揚兵
陣占山河布軍由水草行夏苗侵部落宵遁失蕃營
雲隊攢戈戟風行卷旆旌埃空烽火滅氣勝鼓聲鳴
胡馬辭南牧周師罷北征迴頭問天下何處有欃槍

晚秋鄆城夜會聯句

與李正封

唐韓愈中

從軍古云樂譚笑青油幕燈明夜觀棊月暗秋城柝
正封 羈客方寂歷驚鳥時落泊語闌壯氣衰酒醒寒

砧作愈 遇主貴陳力夷凶匪兼弱百牢犒輿師千戶

購首惡正封 平生耻論兵未暮不輕諾徒然感恩義

誰復論勳爵愈 多士被沾汚小夷施毒蠱何當鑄劍

戟相與歸臺閣正封 室婦歎鳴鶴家人祝喜鵲終朝

考著龜何日親烝祔愈 間使斷津梁潛軍索林薄紅

塵羽書靖大水沙囊涸正封 銘山子所工插羽余何

忤未足煩刀俎祗應輸管鑰愈 雨矢逐天狼電矛驅

海若靈誅固無縱力戰誰敢却正封 峩峩雲梯翔赫

赫火箭著連空隕雉堞照夜焚城郭愈 軍門宣一令

廟筭建三畧雷鼓揭千槍浮橋交萬笱正封 蹂野馬

雲騰映原旗火鑠疲氓墜將拯殘虜狂可縛愈摧鋒

若貍兕超乘如猱獾逢掖服翻慙漫胡纓可愕正封

星殞聞雉雉師興隨唳鶴虎豹貪犬羊鷹鷂憎鳥雀

愈燒陂除積聚灌壘失依託憑軾諭昏迷執爰征暴

虐正封倉空戰卒飢月黑探兵錯兇徒更蹈藉逆族

相嚼嚼愈軸轡亘淮泗旆旌連夏鄂大野縱氏羌長

河浴駟駱正封東西競角逐遠近施贈繳人怨童聚

謠天殃鬼行瘡愈漢刑支郡黜周制閑田削侯社邊

無功鬼薪懲不恪正封余雖司斧鑕情本尚丘壑且

待獻俘囚終當返耕穫愈藁街陳鈇鉞桃塞興錢鏹

地理畫封疆天文掃寥廓正封天子憫瘡痍將軍禁

鹵掠策勳封龍額歸獸獲麟脚愈詰誅敬王怒給復

哀人瘼澤髮解兜牟醜顏傾鑿落正封安存惟恐晚

洗雪不論昨暮烏已安巢春蠶看滿箔愈聲名動朝

闕光寵耀京洛旁午降絲綸中堅擁鼓鐸正封密坐

列珠翠高門塗粉牒跋朝賀書飛塞路歸鞍躍愈魏

闕橫雲漢秦關東巖萼拜迎羅橐鞬問遺結囊橐正

封江淮永清晏宇宙重開拓是日號昇平此年名作

噩愈洪赦方下究武飈亦旁魄南據定蠻陬北攫空

朔漠正封儒生愜教化武士猛刺斫吾相兩優游他

人雙落莫愈印從負鼎佩門為登壇鑿再入更顯嚴

九遷彌蹇諤正封賓筵盡狐趙導騎多衛霍國史擅

芬芳宮娃分綽約愈丹掖列鶴鷺洪鑪衣狐貉摛文

揮月毫講劍淬霜鏑正封命衣備藻火賜樂兼拊搏

兩廂鋪攴瑜五鼎調勺藥愈帶垂蒼玉佩轡感黃金

絡誘接謂登龍趨馳狀傾藿正封青娥翳長袖紅頰

吹鳴籥倘不忍辛勤何由恣歡謔愈惟當早貴富豈

得暫寂寞但擲顧笑金仍祈却老藥正封歿廟配罇

學生堂合馨鑄安行庇松篁高臥枕莞弱愈洗沐恣

蘭芷割烹厭脾臑喜顏非忸怩達志無隕獲正封詎

諧酒席展慷慨戎裝著斬馬祭旄纛包羔禮芒屨愈

山多離隱豹野有求伸螻推選閱群材薦延搜一鶚

正封左右供諂譽親交獻諛喙名聲載揄揚權勢實

熏灼愈道舊生感激當歌發酬酢群孫輕綺紈下客

豐醴酪正封窮天貢睽異匝海賜舖醪作樂鼓還槌

從禽弓始曠愈取歡移日飲求勝通宵博五白氣爭

呼六奇心運度正封恩澤誠布濩噐頑已簫勺告成

上云亭考古垂矩矱愈前堂清夜吹東第良晨酌池

蓮折秋房院竹翻夏籜正封五狩朝恒岱三畋宿楊

柞農書乍討論馬法長懸格愈雪下收新息陽生過

京索爾牛時寢訛我僕或歌号正封帝載彌天地臣
辭劣螢爝為詩安許庶用存糟粕愈

詩雋類函卷五十八

東吳俞安期彙纂 宣城梅鼎祚增定

金明蕭如意訂校

武部四

平虜 收復附 受降 告捷 凱旋
回軍附 宴勞 陣圖 烽火 劍
戍附 弓 弩 箭 彈 並附 旌旗

○平虜

收復附

江都平解嚴 宋謝莊

肅旗簡廟律聳鉞暢乾靈朝晏推物泰通渥抃身寧
擊轅歌至世撫壤頌惟馨

平胡 并序 唐玄宗

五音 卷五十八
戎羯不虔竊我荒服命偏師之俘翦彼應期而咸
殄一麾克定告捷相仍爰作是詩聊以言志

雜虜忽猖狂無何敢亂常羽書朝繼入烽火夜相望
將出凶門勇兵因歿地疆蒙輪皆突騎按劍盡鷹揚
鼓角雄山野龍蛇入戰場流膏潤沙漠濺血染鋒鉞
霧掃清玄漠雲開靜朔方武功今已立文德愧前王

奉和御製平胡

唐韓休初

南牧正紛紛長河起塞氛玉兵徵選士金鉞拜將軍
疊鼓搖邊吹連旌暗朔雲祆星乘夜落害氣入朝分
始見幽烽警俄看烈火焚功成奏凱樂戰罷策歸勳

盛德陳清廟神謨屬大君叨榮逢偃羽率舞詠時文

奉和御製平胡

唐裴灌初

玄漠聖恩通由來書軌同忽聞窺月滿相聚寇雲中
廟畧占黃氣神兵出絳宮將軍行逐虜使者亦和戎
一舉輜輶滅再麾沙朔空直將威禁暴非用武爲雄
飲至明軍禮疇勳錫武功干戈還再戢文德在唐風

同李員外賀哥舒大夫破九曲

唐高適盛

遙聞副丞相昨日破西蕃作氣群山動揚軍大旆翻
奇兵邀轉戰連弩絕歸奔泉噴諸戎血風驅歿虜冤
頭飛攢萬戟面縛聚轅門鬼哭黃埃暮天愁白日昏

石城與巖險鐵騎皆雲屯長策一言決高蹤百代存
威靈懾沙漠忠義感乾坤老將黯無色儒生安敢論
解圍憑廟筭止殺報君恩唯有關河眇蒼茫空樹墩

滅胡曲

唐岑參盛

都護新滅胡士馬氣亦麤蕭條虜塵淨突兀天山孤

平番曲三首

唐劉長卿中

吹角報番營廻軍欲洗兵已教青海外自築漢家城

二

渺渺戍煙孤茫茫塞草枯隴頭那用閉萬里不防胡

三

絕漠大軍還平沙獨戍閑空留一片石萬古在燕山

平秦二首

唐劉禹錫中

秦中秦中衆心歿妖星夜落照河水漢家飛將下天
來馬箠一揮門洞開賊徒奔騰望旗拜有若群蟄驚
春雷狂童面縛登檻車太白妖矯垂捷書相公從容
來鎮撫常侍郊迎負文弩四民歸業閭里閒小兒踉
跳健兒舞

汝南晨鷄喔喔鳴城頭鼓角音和平路傍老人憶舊
事相與感激皆涕零老人收泣前致辭官軍入城人
不知忽驚元和十二載喜見天寶承平時

平齊行二首

唐劉禹錫中

胡塵昔起剗北門河南地屬平盧軍貂裘代馬繞東
岳嶧陽孤桐削爲角地形十二虜意驕恩澤含容歷
四朝魯人皆科帶弓箭齊人不復聞簫韶今朝天子
聖神武手握元符平九土初哀狂童襲故事文告不
來方振怒去秋詔下誅東平官軍四合猶嬰城春來
群鳥噪且驚氣如壞山墮其庭牙門大將有劉生夜
半射箭欃槍星帳中虜血流滿地門外三軍撫連臂
驛騎百首過黃河城中無賊天氣和朝廷侍郎來慰
撫耕夫滿野唱行歌

泰山沈寇六十年旅祭不享生愁煙今逢聖君欲封
禪神使陰兵來助戰妖氛掃盡河水清日觀杲杲慶
雲生開元皇帝東封時蹋曲興無窮調同詞不同願
郎千萬壽長作主人翁

平淮夷雅二篇

并序

唐柳宗元中

皇武命丞相度董師集大功也

皇耆其武于激于淮旣巾乃車環蔡其來狡衆昏囂
甚毒于醒狂奔叫呶以干大刑○皇咨于度惟汝一
德曠誅四紀其後汝克錫汝斧鉞其往視師師是蔡
人以宥以釐○度拜稽首廟于元龜旣禡旣類于社

是宜金節煌煌錫盾雕戈犀甲熊旂威命是荷○度
 拜稽首出次于東天子餞之壘畢是崇鼎臚俎載五
 獻百籩凡百卿士班以周旋○既涉于滄乃翼乃前
 孰圖厥猶其佐多賢宛宛周道于山于川遠揚邇昭
 陟降連連○我旆我旗于道于陌訓于群帥拳勇來
 格公曰徐之無恃額額式和爾容惟義之宅○進次
 于鄆彼昏卒狂妄兇鞠頑鋒蝟斧蟾赤子匍匐厥父
 是亢怒其萌芽以悖太陽○王旅渾渾是佚是怙既
 獲敵師若飢得餽蔡兇伊窘悉起來聚左擣其虛靡
 愆厥慮○載闢載被丞相是臨弛其武刑諭我德心

其危既安有長如林曾是謹誥化為謳吟○皇曰來
 歸汝復相予爵之成國胙以夏區度拜稽首天子聖
 神度拜稽首皇祐下人○淮夷既平震是朔南宜廟
 宜郊以告德音歸牛休馬豐稼于野我武惟皇永保
 無疆

皇武十有一章章八句

方城命愬守也卒入蔡得其大醜以平淮右

方城臨臨王卒峙之匪徼匪競皇有正命皇命于愬
 往舒余仁踣彼艱頑柔惠是馴○愬拜即命于皇之
 訓既礪既攻以後厥刃王師嶷嶷熊羆是式銜勇韜

力日思余殛○寇昏以狂敢蹈愬疆士獲厥心大袒
 高驤長戟酋矛粲其綏章右翦左屠聿禽其良○其
 良既宥告以父母恩柔于肌卒貢爾有維彼攸恃乃
 偵乃誘維彼攸宅乃發乃守○其特爰獲我功我多
 陰謀厥圖以究爾訛雨雪洋洋大風來加于燠其寒
 于邇其遐○汝陰之茫懸瓠之莪是震是拔大殲厥
 家狡虜既縻輸于國都示之市人即社行誅○乃諭
 乃止蔡有厚喜完其室家仰父俯子汝水沄沄既清
 而瀾蔡人行歌我步逶遲○蔡人歌矣蔡風和矣孰
 類蔡初胡髡爾居式慕以康為愿有餘是究是咨皇
 德既舒○皇曰咨愬裕乃父功昔我文祖惟西平是
 庸內誨于家外刑于邦孰是蔡人而不率從○蔡人
 率止惟西平有子西平有子惟我有臣疇允大邦俾
 惠我人于廟告功以顧萬方

方城十有一章章八句

破北虜太和公主歸宮闈

唐許渾晚

毳幕承秋極斷蓬飄颻一劍黑山空匈奴北走荒秦
 壘貴主西還盛漢宮定是廟謨傾種落必知邊寇畏
 驍雄恩沾殘類從歸去莫使華人雜犬戎

收京三首

以下收復

唐杜甫盛

平虜

仙仗離丹極妖星照一作帶玉除須為下殿走不可好
樓居一作得非群盜起難得九重居暫屈汾陽駕聊飛燕將書依然
七廟畧更與萬方初

二

生意甘衰白天涯正寂寥忽聞哀痛詔又下聖明朝
羽翼懷商老文思憶帝堯叨逢罪已日霑洒望青霄

三

汗馬收宮闕春城鏜賊壕賞應歌杖杜歸及薦櫻桃
雜虜橫戈數功臣甲第高萬方頻送喜無乃聖躬勞

收京

唐杜甫盛

復道收京邑兼聞殺犬戎衣冠却扈從車駕已還宮
剋復誠如此安危一作扶危在數公莫令回首地慟哭起
悲風

聞官軍收河南河北

唐杜甫盛

劍外忽傳收薊北初聞涕淚滿衣裳却看妻子愁何
在謾卷詩書喜欲狂白首放歌須縱酒青春作伴好
還鄉即從巫峽穿巴峽便下襄陽向洛陽自注云予田園在東

川

聞王師收二京因書事寄上浙西節度李侍郎

中丞行營五十韻

唐劉長卿中

天上胡星孛人間反氣橫風塵生汗馬河洛縱長鯨
本謂才非據誰防禍已萌食參將可待誅錯輒爲名
萬里兵鋒接三時羽檄驚負恩殊鳥獸流毒遍黎甿
朝市成蕪沒干戈起戰爭人心縣反覆天道暫虛盈
畧地侵中土傳烽到上京王師陷魑魅帝坐逼欃槍
渭水嘶胡馬秦山泣漢兵關原馳萬騎煙火亂千甍
鳳駕瞻西幸龍樓議北征自將行破竹誰學去吹笙
白日重輪慶玄穹再造榮鬼神潛蓄憤夷狄遠輸誠
海內戎衣卷關中賊壘平山川隨轉戰草木助橫行
區宇神功立謳歌帝業成天回萬象變龍見五雲迎

小苑春猶在長安日更明星辰歸正位雷雨發殘生
文物登前古簫韶下太清未央新柳色長樂舊鐘聲
八使推邦彥中司按國程蒼生屬伊呂明主仗韓彭
兇醜將除蔓奸豪已負荆世危看柱石時難識忠貞
薄伐貞貔虎長驅擁旌旌吳山依重鎮江月帶行營
金石懸詞律煙雲動筆精運籌初滅竈調鼎未和羹
北虜傳初解東人望已傾池塘催謝客花木待春卿
昔忝登龍首能傷困驥鳴艱難悲伏劍提握喜懸衡
巴曲誰堪聽秦臺自有情遂令辭短褐仍欲請長纓
久客田園廢初官印綬輕榛蕪上國路苔蘚北山楹

嬾慢羞趨府驅馳憶退耕榴花無暇醉蓬髮帶愁縈
地僻方言異身微俗慮并家憐雙鯉斷才愧小鱗烹
滄海今猶值青陽歲又更洲香生杜若谿暖戲鷓鴣
煙雪宜春後塞開值晚晴潮聲來萬井山色映孤城
旅夢親喬木歸心亂早鶯儻無知已在今已訪蓬瀛

收襄陽城二首

唐岑參盛

悲風慘慘雨脩脩峴北山低草木愁暗發前軍連夜
戰平明旌旆入襄州
五營飛將擁霜戈百里僵屍滿澧河日暮歸來看劍
血將軍却恨殺人多

復京

唐李商隱晚

虜騎胡兵一戰摧萬靈迴首賀軒臺天教李令心如
日可要昭陵石馬來

○受降

雲中受突厥主朝宴席賦

大業三年八月帝北巡車駕發榆林歷雲

中沂金河時天下承平百物豐實甲士五十餘萬馬十萬正旌旗輜重千里不絕突厥啓民克汗奉廬帳以俟車駕帝幸其帳啟民奉觴上壽帝大悅賦詩曰

隋煬帝

鹿塞鴻旗駐龍庭翠輦回羶帷望風舉穹廬向日開
呼韓頓顙至屠者接踵來索辮擎羶肉韋鞬獻酒杯

如何漢天子空上單于臺

北庭西郊候封大夫受降回軍獻上

唐岑參盛

胡地首宿美輪臺征馬肥大夫討匈奴前月西出師
甲兵未得戰降虜來如歸橐駝何連連穹帳亦纍纍
陰山烽火滅劍水羽書稀却笑霍嫫姚區區徒爾爲
西郊候中軍平沙懸落暉驛馬從西來雙節夾路馳
喜鵲捧金印蛟龍蟠畫旗如公未四十富貴能及時
直上排青雲傍看疾若飛前年斬樓蘭去歲平月支
天子日殊寵朝廷方見推何幸一書生忽蒙國士知

側身佐戎幕斂衽事邊陲自逐定遠侯亦著短後衣
近來能走馬不弱并州兒

○告捷

旋師喜捷

唐玄宗

邊服胡塵起長安漢將飛龍蛇開陣法貔虎振軍威
詐虜腦塗地征夫血染衣今朝書奏入明日凱歌歸
侍宴旋師喜捷應制

唐韋安石初

蜂蟻屯夷落熊羆逐漢飛忘軀百戰後屈指一年歸
厚眷紆天藻深慈解御衣興酣歌舞出朝野歎光輝
還至張掖古城聞東軍告捷贈韋五

唐陳子昂 初

孟秋首歸路仲月旅邊亭聞道蘭山戰相邀在井陘
屢鬪關月滿三捷虜雲平漢軍追北地胡騎走南庭
君為幕中士疇昔好言兵白虎鋒應出青龍陣幾成
披圖見丞相按節入咸京寧知玉門道空作隴西行
北海朱旄落東歸白露生縱橫未得意寂寞寡相迎
負劍空歎息蒼茫登古城

太社觀獻捷

入翰林試以
功字為韻

唐白居易 中

淮海妖氛滅乾坤喜氣通班師郊社內操袂凱歌中
廟筭無遺策天兵不戰功小臣同鳥獸率舞向皇風

觀劍南獻捷

唐□□□□

遐圻新破虜名將舊登壇戎首西南至氊裘君長觀
邊疆氣已息矛戟血猶殘紫陌歡聲動丹墀嘉氣盤
唐虞方德易衛霍比功難共覩俘囚入賡歌萬國安

河中獻捷

唐張隨

叛將忘恩久王師不戰通凱歌千里內佳氣二儀中
寇盡條山下兵迴漢苑東將軍初執信明主欲論功
落日煙塵盡寒郊壁壘空蒼生幸無事自此樂堯風

凱旋

回軍附

河梁歌

吳越春秋曰越句踐既滅吳霸諸侯號
令于齊楚秦晉皆輔周室秦厲公不如

凱旋

命旬踐乃選吳越將士西渡河以攻秦秦人懼白引咎越乃還軍軍人悅樂作河梁之詩

渡河梁兮渡河梁舉兵所伐攻秦王孟冬十月多雪

霜隆寒道路誠難當陳兵未濟秦師降胡江諸侯怖

懼皆恐惶聲傳海內威遠邦稱伯穆桓齊楚莊天下

安寧壽考長悲去歸兮河無梁

勞還師歌

晉張華

獫狁背天德構亂擾邦畿戎車震朔野群帥贊皇威

將士齊心旅感義忘其私積勢如鞞弩赴節如發機

蹀聲動山谷金光耀素暉揮戟一作陵勁敵武步蹈

橫屍鯨鯢皆授首北土永清夷昔往冒隆暑今來白

雪霏征夫信勤瘁自古詠采薇收榮於舍爵燕喜在

凱歸

凱樂歌詞三首

隋無名氏

於穆我后睿哲欽明膺天之命載育群生開元創曆

邁德垂聲朝宗萬寓祗事百靈煥乎皇道昭哉帝則

惠政滂流仁風四塞淮海未賓江湖背德運籌必勝

濯征斯克八荒霧卷四表雲塞雄圖盛略邁後光前

寰區已泰福祚方延長歌凱樂天子萬年

二

帝德遠覃天維宏布功高雲天聲隆韶濩惟彼海隅

未從王度皇赫斯怒元戎啓路桓桓猛將赳赳英謨
攻如燎髮戰似摧枯救茲塗炭克彼一作妖逋塵清
兩越氣靜三吳鯨鯢已夷封疆載闢班馬蕭蕭歸旌
奕奕雲臺表効司勳紀績業竝山河道固金石

三

阪泉軒德丹浦堯勳始實以武終乃以文嘉樂聖主
大哉爲君出師命將廓定重氛書軌旣并干戈是戢
弘風設教政成人立禮樂聿興衣裳載戢風雲自美
嘉祥爰集皇皇聖政穆穆神猷牢籠虞夏度越姬劉
日月比耀天地同休永清四海長帝九州

軍師凱旋自邕州順流舟中

唐李嶠

初

鳴鞞入嶂口汎舸歷川湄尚想江陵陣猶疑下瀨師
岸迴帆影疾風逆鼓聲遲萍葉沾蘭槳林花拂桂旗
弓鳴蒼隼落劍動白猿悲芳樹吟羌管幽篁入楚詞
全軍多勝策無戰在明時寄謝山東妙長纓徒自欺

獻封大夫破播仙凱歌六首

岑參送封大夫出師西征序曰天寶

中匈奴回紇寇邊踰花門畧金山煙塵相連
侵軼海濱天子於是授鉞常清出師征之及
破播仙奏捷獻凱參乃作凱歌○按唐書封
常清傳曰開元末達奚背叛自黑山北向西
趣碎葉其後常清破賊有功天寶六年又從
高仙芝破小勃律不言播仙疑史之闕文也

唐岑參

盛

漢將承恩西破戎捷書先奏未央宮天子預開麟閣
待祗今誰數貳師功

官軍西出過樓蘭營幕傍臨月窟寒蒲海曉霜凝馬
尾葱山夜雪撲旌竿

鳴笳疊鼓擁回軍破國平番昔未聞丈夫鵠印搖邊
月大將龍旗掣海雲

日落轅門鼓角鳴千群西縛出蕃城洗兵魚海雲迎
陣秣馬龍堆月照營

番軍遙見漢家營蒲谷連山遍哭聲萬箭千刀一夜
殺平明流血浸空城

暮雨旌旗濕未乾胡煙白草日光寒昨夜將軍連曉
戰番軍只見馬空鞍

九曲詞三首

天寶中哥舒翰攻破吐蕃洪濟大漠等城收黃河九曲以其地置郡

適由是作九曲詞

唐高適

盛

許國從來微廟堂連年不為在壇場將軍天上封侯
印御史臺中異姓王

萬騎爭歌楊柳春千場對舞繡麒麟到處盡逢歡洽
事相看總是太平人

鐵騎橫行鐵嶺頭西看邏迤取封侯青海只今將飲
馬黃河不用更防秋

元和癸巳歲仲秋詔發江陵偏師問罪蠻徼後
命宣慰釋兵歸降凱旋之辰率爾成詠

唐劉禹錫中

蠻水阻朝宗兵符下渚宮前籌得上策無戰已成功
漢使星飛入夷心草偃同歡謠開竹棧拜舞戢桑弓
就日知冰釋投人念鳥窮網羅三面解章奏九門通
卉服聯操袂雕題盡鞠躬降幡秋練白驛騎晝塵紅
火號休傳警機橋罷巨空登山不見虜振旆自生風
江遠煙波靜軍回氣色雄佇看聞喜後金石賜元戎
聞常山旋師出勳宥過王澤大洽因寄李六侍

郎

唐劉禹錫中

昨聞凱歌旋飲至酒如淮無戰陋丹水垂仁輕藁街
清廟既策勳圓丘俟燔柴車馬一以混幽遠靡不懷
逐客顛顛久故鄉雲雨乖禽魚各有化予欲問齊諧

凱樂歌辭五首

唐書樂志曰唐制凡命將出征有大功獻俘馘其凱樂用饒吹

二部樂器有笛箏簫箏箏鼓歌七種迭奏
破陣樂等四曲一破陣樂二應聖期三賀聖
歡四君臣同慶樂初太宗平東都破宋金剛
其後蘇定方執賀魯李勣平高麗皆修軍容
凱歌以入而貞觀顯慶開元禮並無儀注太
常舊有破陣樂應聖期兩曲歌辭至太和三
年始具儀注又補
撰三曲為五曲云

唐□□□晚

受律辭元首相將討叛臣咸歌破陣樂共賞太平人

二 聖德期昌運雍熙萬寓清乾坤資化育海嶽共休明

三 關土欣耕稼銷戈遂偃兵殊方歌帝澤執贄賀昇平

四 四海皇風被千年德水清戎衣更不著今日告功成

五 主聖開昌歷忠臣奉大猷君看偃革後便是太平秋

凱歌進詩 唐白敏中 晚 一詔皇城四海頒醜戎無數束身還戍樓吹角人休

戰牧野嘶風馬自閒河水九盤收數曲天山千里鎖

諸關西邊北塞今無事為報東南夷與蠻

和敏中凱歌進詩

唐馬植 晚

舜德堯仁化犬戎許提河隴款皇風指揮貔虎皆神

算恢拓乾坤是聖功四帥有征無汗馬七關雖戍已

弋弓天留此事還英主不在他年在大中

凱歌進詩

唐崔鉉 晚

邊陲萬里注恩波宇宙羣方洽凱歌右地名王爭解

辯遠方戎壘盡投戈煙塵永息三秋戍瑞歲遙清九

折河共偶聖明千載運更觀俗阜與時和

田侍郎歸鎮八首

唐王建中

去處長將決勝籌
迴迴身在陣前頭
賊城破後先鋒入
看著紅妝不敢收

熨帖朝衣拋戰袍
夔龍班裏侍中高
對時先奏牙間將
次第天恩與節旄

踏著家鄉馬脚輕
暮山秋色眼前明
老人上酒齊頭拜
得侍中來盡再生

功成誰不用蕃方
富貴還須是本鄉
萬里雙旌汾水上
玉鞭遙指白雲莊

鼓吹旗旛道兩邊
行男走女喜駢闐
舊交省得當時別
指點如今却少年

廣場破陣樂初休
彩燵高於百尺樓
老將氣雄爭起舞
管絃迴作大纏頭

笳聲萬里動燕山
草白天青塞馬閒
觸處不如別處樂
可憐秋月照江關

將士請不忘却貧
綠牕紅燭酒樓新
家家盡踏還鄉曲
明月街中不絕人

送袁郎中破賊北歸

唐皇甫冉中

優詔親賢時獨稀
中途紫綬換征衣
黃香省闥登朝去
楊僕樓船振旅歸
萬里長聞隨戰角
十年不得偃

郊扉□□□□□□□□但將詞賦奉恩輝

和袁郎中破賊後經剡中山水 唐皇甫冉 中

武庫分帷幄儒衣事鼓鼙兵連越徼外寇靜海門西
節比全疎勒功當雪會稽旌旗廻剡嶺士馬濯靈溪
受律梅初發班師草未齊行看佩金印豈得訪丹梯
和袁郎中破賊後經剡縣山水上太尉

唐李嘉祐 中

受律仙郎貴長驅下會稽鳴笳山月曉控旆野雲低
剪寇人皆賀迴軍馬自嘶地閒春草綠城靜夜烏啼
破竹清閩嶺看花入剡溪元戎催獻捷莫道事攀躋

潤州楊別駕宅送蔣侍御收兵歸揚州

唐李嘉祐 中

沴氣清金虎兵威壯鐵冠揚旌川色暗吹角水風寒
人對輜輶醉花垂睥睨殘羨歸丞相閣空望舊門欄
晉公破賊回重拜台司以詩示幕中賓客

唐韓愈 中

南伐旋師太華東天書夜到册元功將軍舊壓三司
貴相國新兼五等崇鷓鴣欲歸仙仗裏熊羆還入禁
營中長慚典午非材職得就閑官即至公

觀回軍

唐李益 中

行行上隴頭隴月暗悠悠萬里將軍沒回旌隴戍秋
誰令嗚咽水重入故宮流

觀軍回戈

唐韋莊晚

關中群盜已心離關外猶聞羽檄飛御苑綠莎嘶戰
馬禁城寒月擣征衣漫教韓信兵塗地不及劉琨嘯
解圍昨日屯軍還夜遁蒲車空載洛神歸

○宴勞

正陽堂宴勞凱旋

梁沈約

凱入同高宴飲至均多祐昔往歌采薇今來歡杖杜
善戰惟我皇勝之不窺刃推轂授神謨餘壯終能賈

浩蕩金壘溢周流玉觴傳

宴詩

北史曰武成三年討平文州氏師還帝宴
群公卿士仍賦詩言志琳詩末章云云帝
大悅曰獯獯陸梁末時欵
塞卿言有驗國之福也

北周高琳

寄言竇章騎為謝霍將軍何以報天子沙漠靜妖氛

陪柏中丞觀宴將士二首

唐杜甫盛

極樂三軍士誰知百戰場無私齊綺饌久坐密金章
醉客霑鸚鵡佳人指鳳凰幾時來翠節特地引紅妝

二

繡段裝簷額金花帖鼓腰一夫先舞劍百戲後歌鏹
江樹城孤遠雲臺使寂寥漢朝頻選將應拜霍嫖姚

軍中冬燕

唐韋應物

中

滄海已云宴皇恩猶念勤式燕徧恒秩柔遠及斯人
茲邦實大藩伐鼓軍樂陳是時冬服成戎士氣益振
虎竹謬朝寄英賢降上賓旋罄周旋禮媿無海陸珍
庭中丸劍闌堂上歌吹新光景不知晚觥酌豈言頻
單醪昔所感大醪况同欣顧謂軍中士仰答何由申
賀州宴行營回將

唐羊士諤

中

丸劍盈庭酒滿卮戍人歸日及瓜時元戎靜鎮無邊
事盡道營中偃畫旗

○陣圖

八陣圖

晉桓溫

聖古識其真臨源愛往跡恐君遺事節聊下南山石

八陣圖

唐杜甫

盛

功蓋三分國名成八陣圖江流石不轉遺恨失吞吳

觀八陣圖

唐劉禹錫

中

軒皇傳上畧蜀相運神機水落龍蛇出平沙鵝鸛飛
波濤無動勢鱗介避餘威會有知兵者臨岐指是非

○烽火

夕烽

唐杜甫

盛

夕烽來不近每日報平安塞上傳光小雲邊落點殘

照秦通警急過隴自艱難聞道蓬萊殿千門立馬看

烽火

唐韓愈中

登高望烽火誰謂塞塵飛王城富且樂曷不事光輝
勿言日已暮相見恐行稀願君熟念此秉燭夜中歸
我歌寧自感乃獨淚沾衣

○劍

寶劍

梁吳均

我有一寶劍出自昆吾谿照人如照水切玉如切泥
鏗邊霜凜凜匣上風淒淒寄語張公子何當來見携

詠劍

唐崔融初

寶劍出昆吾龜龍夾采珠五精初獻術千戶競論都
匣氣衝牛斗山形轉轆轤欲知天下貴持此問風胡

詠劍

唐李嶠初

我有昆吾劍求趨天子庭白虹時切玉紫氣夜干星
鏗上芙蓉動匣中霜雪明倚天持報國畫地取雄名

寶劍篇

唐李嶠初

吳山開越溪涸三金合冶成寶鏗淬綠水鑿紅雲五
采焰起光氛氲背上名為萬年字胸中點作七星文
龜甲參差白虵色轆轤宛轉黃金飾文犀中斷寧方
利駿馬群駢未擬直風霜凜凜匣上青精氣滢滢斗

間明避災朝穿晉帝屋逃亂夜入楚王城一朝運偶
逢大仙虎吼龍鳴騰上天東谷顯昇紫微座西王佩
下赤城田承平久息干戈事僥倖得充文武備除災
辟患宜君王益壽延齡後天地

寶劍篇

唐郭元振初

君不見昆吾鐵冶飛炎煙紅光紫氣俱赫然良工鍛
鍊凡幾年鑄得寶劍名龍泉龍泉顏色如霜雪良工
嗟咨歎奇絕琉璃玉匣吐蓮花錯鏤金環映明月正
逢天下無風塵幸得周防君子身精光黯黯青虵色
文章片片綠龜鱗非直結交游俠子亦曾親近英雄

人何言中路遭棄捐零落飄淪古獄邊雖復沈埋無

所用猶能夜夜氣衝天

郭代公元振初尉通泉任俠使氣撥去小節武后知所為

召欲詰責既與語奇之業索所為文章上寶劍篇后覽嘉歎詔示學士李嶠等

寶劍

原作古風

唐李白盛

寶劍雙蛟龍雪花照芙蓉精光射天地雷騰不可衝
一去別金匣飛沈失相從風胡滅已久所以潛其鋒
吳水深萬丈楚山邈千重雌雄終不隔神物會當逢

寶劍篇

唐劉長卿中

寶劍不可得相逢幾許難今朝一度見赤色照人寒
匣裏星文動環邊月影殘自然神鬼伏無事莫空彈

正音
卷五十八
蕃劍

唐杜甫盛

致此自僻遠又非珠玉裝如何有奇怪每夜吐光芒
虎氣必騰上龍身寧久藏風塵苦未息持汝奉明王

古劍

唐劉長卿中

龍泉閒古匣苔蘚淪此地何意久藏鋒翻令世人棄
鐵衣今正澀寶刃猶可試儻遇拂拭恩應知剗犀利

李都尉古劍

唐白居易中

古劍寒黯黯鑄來幾千秋白光納日月紫氣排斗牛
湛然玉匣中秋水澄不流至寶有本性精剛無與儔
可使寸寸折不能繞指柔願快直士心將斷佞臣頭

不願報小怨夜半刺私讐勸君慎所用無作神兵羞

古劍行

唐韋應物中

千年土中兩刃鐵土蝕不入金星滅沈沈青春鱗甲
滿蛟龍無足虵尾斷忽欲飛動中有靈豪士得之敵
國寶仇家舉意半夜鳴小兒女子不可近龍虵變化
此中隱夏雲奔走雷闐闐恐成霹靂飛上天

春坊正字劍子歌

唐李賀中

先輩匣中三尺水曾入吳潭斬龍子隙月斜明刮露
寒練帶平鋪吹不起蛟胎皮老蒺藜刺鷓鴣淬花白
鷗尾直是荆軻一片心莫教照見春坊字接絲團金

懸麗殺神光欲截藍田玉提出西方白帝驚嗷嗷鬼
母秋郊哭

仗劍行

唐萬齊融盛

昨夜星宮動紫微今年天子用武威登車一呼風雷
動遙振陰山撼巍巍胡驕子當見旄頭蝕應死願騎
單馬仗天威接取長繩縛虜歸仗劍遙叱路傍子匈
奴頭血濺君衣

賦得錦帶佩吳鉤

唐張友正

帶劍誰家子春朝紫陌遊結邊霞聚錦縣處月隨鉤
絲縷迴文出雄芒練影浮葉依花裏艷霜向鏢中秋

的皜□駉馬爛熳映綺裘應須持報國一刃月支頭

觀淬龍泉劍

唐裴夷

歐冶將成器風胡幸見逢發硎思剗玉投水化爲龍
詎肯藏深匣終期用剗鐘蓮花生寶鏢秋日勵霜鋒
鍊質纔三尺吹毛過百重聲一作擊磨如不倦提握願
長從

劍化爲龍

唐張聿

古劍誠難屈精明有所從沈埋方出獄合會却成龍
牛斗寬初歇蜿蜒氣漸濃雲濤透百丈水府躍千重
拖尾迷蓮鏢張鱗露錦容至今沙岸下誰得覩玄蹤

劍客

唐賈島中

十年磨一劍霜刃未曾試今日把似君誰為不平事

○刀 戈附

刀

魏王粲

相時陰陽制茲利兵和諸色剗考諸濁清陸剗犀兕
水截鯢鯨君子服之式章威靈

刀三首

北周庾信

風伯吹鑪雲師煉一作鍊冶鐵燄朝流金精夜下價重

十城名高千馬

千金穎合百煉鋒成光連斗氣燄動山精身文水動

刃古珠生

斗精遙降山靈下從水文千曲虵鱗百重燕砥斂刃
蜀水開鋒氣生分景環成屈龍

詠刀

唐李嶠初

列辟鳴鸞至惟良佩犢旋帶環疑寫月引鑑似含泉
入夢華梁上含鋒彩筆前莫驚開百鍊特擬定三邊

荆南兵馬使太常卿趙公大食刀歌大食國名

唐杜甫盛

太常樓船聲嗷嘈問兵刮寇超下牢牧出令奔飛百
艘猛蛟突獸紛騰逃白帝寒城駐錦袍玄冬示我胡

國刀壯士短衣頭虎毛憑軒拔鞘天爲高翻風轉日
木怒號冰翼雲淡傷哀猿鐫錯碧巖鷓鴣膏鏗鏘已
瑩虛秋濤鬼物撇捩亂坑壕蒼水使者捫赤條龍伯
國人罷釣鰲芮公回首顏色勞分閩救世用賢豪趙
公玉立高歌起攬環結佩相終始萬歲持之護天子
得君亂絲與君理蜀江如線針如水荆岑彈丸心未
已賊臣惡子休干紀魑魅魍魎徒爲耳妖腰亂領敢
欣喜用之不高亦不痺不似長劍須天倚吁嗟光祿
英雄弭大食寶刀聊可比丹青宛轉麒麟裏光芒六
合無泥滓

崔五六圖屏風各賦一物得烏孫佩刀

唐李頎盛

烏孫腰間佩兩刀刃可吹毛錦爲帶握中枕宿穹廬
室馬上割飛翳螭塞執之魍魎誰能前氣凜清風沙
漠邊磨用陰山一片玉洗將胡地獨流泉主人屏風
寫奇狀鐵銷金環儼相向回頭瞪目時一看使予心
在江湖上

難縮刀子歌

唐盧綸中

黃金鞘裏青蘆葉麗若翦成鈿且髮輕冰薄玉狀不
分一尺寒光堪映雲吹毛可試不可觸似有蟲搜闕

裂文淬之幾墮前池水焉知不是蛟龍子割鷄刺虎
皆若空願應君心逐君指并州難縮竟何人每成此
物如有神

詠戈

唐李嶠初

富父春暎日殷辛漂杵年曉霜含白刃落影駐雕鋌
夕擯金門側朝提玉塞前願隨龍影度橫口陣雲邊
○弓 弩 箭 彈並附

詠弓

梁宣帝

虞人招不進繁氏久稱工已悲軒主跡復挹楚王風
詠弓 唐太宗

上弦明月半激箭流星遠落鴈帶書驚啼猿映枝轉

奉和詠弓

唐楊師道初

霜重麟膠勁風高月影圓鳥飛隨帝輦鴈落逐鳴絃

詠弓

唐李嶠初

桃文稱辟惡桑質表初生宛轉雕韃際依稀半月明
遙彎落鴈影虛引怯猿聲徒切鳥號思攀龍遂不成

賦弩

吳朱異

南岳之幹鍾山之桐應機命中射隼高墉

詠弩

唐李嶠初

挺質本軒黃申威振遠方機張驚雉雒玉彩耀星芒

高鳥行應盡清猿坐見傷蘇秦六百步持此說韓王

詠箭

唐李嶠初

漢甸初收羽燕城忽解圍影隨流水急光帶落星飛
夏列三成範堯沈九日輝斷蛟雲夢澤希為識忘歸

長平箭頭歌

唐李賀中

漆灰骨末丹水沙淒淒古血生銅花白翎金斨雨中
盡直餘三春殘狼死我尋平原乘兩馬驛東石田蒿
塢下風長日短星蕭蕭黑旗雲濕懸空夜左冤右鬼
啼肌瘦酪瓶倒盡將羊炙蟲棲鴈病蘆筍紅迴風送
客吹陰火訪古沉瀾收斷鏃折鋒赤豐會封肉南陌

東城馬上兒勸我將金換簦竹

詠彈

唐李嶠初

俠客持蘇合佳游滿帝鄉避丸深可誚求炙遂難忘
金迸疑星落珠成似月光誰知少孺子將此見吳王

南林彈

晉桓玄

散帶躡良駟揮彈出長林歸翮赴舊栖喬木轉翔禽
落羽尋絕響屢中轉應心

○旌旗

詠旌

唐李嶠初

告善康莊側求賢市肆中擁麾分彩雉持節曳丹虹

影麗天山雪光搖朔塞風方知美周政抗旆賦車攻

詠旗

唐李嶠初

桂影承宵月虹輝接曙雲縱橫齊八陣舒卷引三軍
日薄蛟龍影風翻鳥隼文誰知懷勇志蟠地幾繽紛

揚旗

六月成都尹鄭公置酒公堂觀騎士試新旗幟

唐杜甫盛

江雨颯長夏府中有餘清我公會賓客肅肅有異聲
初筵閱軍裝羅列照廣庭空六馬入駃駃揚旗旌
迴迴偃飛蓋熠熠迸流星來纏風颯急去擘山嶽傾
材歸俯身盡妙取畧地平虹霓就掌握舒卷隨人輕
三州陷犬戎但見西嶺青公來練猛士欲奪天邊城

此堂不易升庸蜀日已寧吾徒且加餐休適蠻與荆

○鞭

詠馬鞭

唐高適盛

龍竹養根凡幾年工人截之為長鞭一節一目皆天
然珠重重星連連繞指柔純金堅繩不直規不圓把
向空中捎一聲良馬有心日馳千

賦得鐵馬鞭

唐戎昱中

成器雖因匠懷剛本自天為憐持寸節長擬靜三邊
未入英髦用空存鐵石堅希君剖腹取還解抱龍泉

露青竹杖歌

唐顧況中

鮮于仲通正當年章仇兼瓊在蜀川約束蜀兒採馬
鞭蜀兒採鞭不敢眠橫截斜飛飛鳥邊繩橋夜上層
崖顛頭插白雲捧飛泉採得馬鞭長且堅浮漚丁子
珠聯聯灰煮蠟指光爛然章仇兼瓊持上天上天雨
露何其偏飛龍閑廐馬數千朝飲吳江夕秣燕紅塵
撲轡汗濕韉獅子麒麟聊比肩江面昆明洗刷牽四
蹄踏浪頭拊天蛟龍稽顙河伯虔拓羯胡雛脚手鮮
陳閔韓幹丹青妍欲貌未貌眼欲穿金鞍玉勒錦連
乾騎入桃花楊柳煙十二樓中奏管絃樓中美人奪
神仙爭愛大家把此鞭祿山入關關破年忽見揚州
北印前祗有人還千一錢亭亭筆直無皺節磨將形
相一條鐵市頭格是無人別江海賤臣不拘綫垂窓
挂影西窓缺稚子覓衣桃仰穴家僮拾薪幾拘折玉
潤猶沾玉壘雪碧鮮似染萇弘血蜀帝城邊子規咽
相如橋上文君絕往年策馬降至尊七盤九折橫劍
門穆王八駿超崑崙安用冉冉孤山根聖人不貴難
得貨金玉珊瑚誰買恩

新貴金玉無所不有

門庭主人親臨直宿安眠由再為山遊聖人不貴

時收飾上文百餘山平漢思獨至真才繼此世海

斷斷古玉壘雲霧翰翰彩舞長血骨節壯幾千與

林澤西樹幾許千真本樹才入家前命落幾時附

時一新趨市面俗具無人眼古彩幾日不附幾連

非明而逐亦入數不一幾亭亭筆直無幾幾幾幾

